


PLVTARCHI
COMMENTA-
RIVS STOICORVM
CONTRARIO-
RVM,

Ed. Henrysone Iureconsulto
interprete,

AD

*Franciscum Duarenum Iureconsulto-
rum etate sua principem.*



LVGDVNI,

*Apud Gulielmum Rouillium, sub
scuto Veneto.*

1555.

FRANCISCO DVA-
reno Iureconsulto.

IAni bifrontis Phæbo referente Calendas,
Solennem mitto gratans, Duarene, salutem,
Cum strenua tenui, qua te, diuine magister,
Prosequor, vt lymphæ Regem vola rustica ma-
gnum.

Nec magè te docet hæc interpres pagina, talem,
Qualis spado Arelas, inimicus & induperatis,
Phauorinus erat Gallorum gloria Graia:
Quàm mola salsa Deos alit, aut libamina fusa
Humectant, hominum superos mera signa co-
lentum.

Nec tu sola tenes vulgaria iura citator:
Sed veram Sophiam percalles, artibus illis
Instructus, quibus humana & diuina sciuntur.
Sic tibi Graiorum sapientum dogmata nota
Iure fero, tetrici studij solatia grata.

Antinomus ergo Paulos & Papinianos
Componis scitè. Nunc quàm contraria dicent
Zeno prima Stoæ, et Chrysippus summa colliua,
Accipe: quæ cerebro Plutarchus putidiore
Lectæ sibi aduersis opponit frontibus acer.
Gallorum Franciscæ decus Duarene valet.

Hæc Scotus Henryson signauit carmine pingui.



STOICORVM
CONTRARIO-
RVM COMMEN-
TARIVS.

¶



HOC PRIMVM
omnium postulo, vt pla-
citorum consensio in vitæ
actionibus conspiciatur.
Neque enim tam conue-
nit Oratorem (vt ait Aeschines) ac legem
idem sonare, quàm Philosophi vitam & di-
sputationem consentire. Nam disputatio
Philosophi est priuilegium sua sibi volunta-
te irrogatum. Siquidem, vt se res habet, ita
quoque existimant, Philosophiam esse non
ludicram rem, aut verborum opificem, glo-
ria seruientem, sed negotium maximo stu-

dio dignum. Quum itaque multa, vt in
disputationibus, mera verba ipsi Zenoni,
multa etiam Cleanthi, plurima sanè Chry-
sippo scripta sint de Republica, de paren-
do, imperando, iudicando, dicendo: in nullius
verò ipsorum vita reperiri possit exercitus
ductatio, legislatio, aditus in curiam, aduo-
catio, militia pro patria, legatio, largitio,
sed contrà peregrè otio, tanquam loto, gu-
stato, vitam, & eam non breuem, sed lon-
gissimam sermonibus, libris, deambulationi-
bus dediti transegerint, non est obscu-
rum, quin aliorum magis scriptis atque di-
ctis, quàm suo sensu iudicioque, ducti vixe-
rint, vt qui in ea, quam epicurus & Hiero-
nymus laudant, quiete toti consenuerint.
Nam ipse etiam Chrysippus in libro quar-
to de vitis, nihil putat otiosam vitam à vo-
luptaria differre. Verùm ipsa eius verba
adscribam. Qui putant otiosam vitam Phi-
losophis maximè cōuenire, ij mihi à princi-
pio videntur errare. Nam arbitrantur de-
lecta

» lectionis, aut huiusmodi alicuius rei gra-
 » tia philosophandum esse, vitamque sic, hoc
 » est, si verè res perpendatur, suauiter tradu-
 » cendam. Neque enim ignorare nos oportet
 hanc eorum de philosophia opinionem, quam
 multi aperte dicunt, non pauci verò obscu-
 rius significant. Ecquis igitur verius in
 isthac otiosa vita cōsenuit, quàm Chrysip-
 pus, Cleāthes, Diogenes, Zeno, Antipater?
 qui patriam quoque suam non alia de causa
 dereliquerunt, quàm vt in suauiore vita &
 balteo otiosi sermonibus vacarent. Aristoc-
 reon itaque Chrysippi discipulus ac fami-
 liaris, quam posuit, statuæ hoc elegium in-
 scripsit:

*Hic Academiæ nodorum est certa securis
 Chrysippus iuuenis. Stitit Aristocreon.*

Hæc igitur securis est non iuuenis mo-
 dò Chrysippus, sed etiam ille senex, ille, qui
 regię politicæque vitæ laudator otiosam
 nihil à voluptaria differre putat. Qui ve-
 rò ex eis ad Rempub. accedunt, magis etiam

decretis suis repugnant. Nam magistratus, iudicis, senatoris, legislatoris, munere funguntur: supplicio, præmio afficiunt, quasi civitates essent, quibus præsunt, quasi senatores ac iudices essent, qui dignitates eas sortiuntur, quasi imperatores, qui suffragiis sublatarum manuum ductandis exercitibus creantur, quasi denique leges essent eæ, quas Clisthenes, Lycurgus, Solon tulerunt, cum malos eos, & stultos fuisse dicant. Quare etiam cum Remp. capeßunt, ipsi se refel-
lunt.

SED ET Antipater in libro de Cleanthis & Chrysippi dissensione memoria prodidit, Zenonem & Cleanthem civitate ab Atheniensibus donari noluisse, ne suam patriam sic offendere viderentur. Quod hæc quidem eorum recusatio, si fuit honesta, turpem fuisse convincat Chrysippi acceptationem, qui in eam civitatem adscribi voluit, nunc non disputabo. Illud certè magnam & absurdam repugnantiam
continet,

continet, quòd nomina sola patriis suis seruabant, cum corpora, & vitæ actiones, fructusque in tam longinquam peregrinitatem transtulissent. Quod perinde est, ac si quis, vxore dimissa, cum alia viueret, cubitaret, liberos ex ea susciperet, nollet tamen cum ipsa instrumenta nuptialia conficere, ne priorem iniuria videatur afficere.

R V R S V S Chrysippus, in libro de rhetorica scribens, Sapientem sic causas oraturum, magistratus gesturum, tãquam diuitiæ, gloria, sanitas sint res bonæ, confitetur disputationes suas domi nos cõtinerere, à rep. auocare, vtilitatibus ac actionibus vitæ decreta sua non conuenire.

P R A E T E R E A Zenonis decretũ est, Templà ædificanda non esse. Templum enim. si vile est, nec sanctum est. Atqui fabrilium & mechanicorum operum nullum magno æstimandum, sed omne vile iudicandum est. Verũ qui decretum istud, vt re-
ctum, laudant, iudem in templis initiantur,

arcem ascendunt, supplicant statuis, templa
coronant: cum sint tamen ista fabrorum
& mechanicorum hominum opera. Itane
verò Stoici putant Epicureorum incon-
stantiam redargui, quòd Diis operantur,
cum clarius ipsi se refutent, in aris ac tem-
plis sacrificantes, quæ nec esse, nec ædifica-
ri debere contendunt.

ZENO PLURES & differentes
inter se virtutes facit, Platonis more, ut pru-
dentiam, fortitudinem, temperantiam, iusti-
tiam, quasi sint indiuiduæ quidem, sed tamen
ut aliæ atque aliæ inter se discrepent. Rur-
sus singulas definiens, fortitudinem dicit,
prudentiam esse in rebus gerendis atque
efficiendis, iustitiam verò, prudentiam esse
in rebus distribuendis versantem: ac si vir-
tus quidem sit una, sed pro rerum habitu
ac qualitate in actionibus differre videat-
ur. Neque verò Zeno solus in istis sibi con-
trarius esse apparet, sed etiam Chrysippus
secum ipse pugnat: quippè qui Aristonem
quidem

quidem reprehendat, dicentem vnius virtutis reliquas esse habitus, Zenoni verò patrocinetur, quomodo dixi, singulas virtutes definienti.

CLEANTHES autem in commentariis rerum naturalium dixit tonum esse ignis ictum: ac si tantus in animo fiat, ut exequendis officiis sufficiat, vim ac robur appellari: deinde hæc ipsa verba subiicit:
„ Hæc vis, hoc robur, quando in obiectis re-
„ bus perseueranter tuendis existit, constan-
„ tia est: quando in tolerandis cernitur, for-
„ titudo est: circa dignitates verò, iustitia:
„ circa appetitiones, ac declinationes, tem-
„ perantia seu modestia est.

ZENO ci, qui dixerat,

Iudicium expedias neutri, ni dicat vterque, huiusmodi ratione contradicebat: Siue probauit, qui prior dixit, non est audiendus posterior: quippè finem habet quæstio: siue non probauit, nec hoc casu alter est audiendus. Nanque perinde se res habet, ac si cita-

tus prior non audiuiſſet, aut exaudita citatione non dixiſſet, ſed cantillaſſet. Ergo ſiue probauit prior, ſiue id minus, poſterioris oratio non eſt audienda. Verùm is qui hac interrogatiuncula eſt argutatus, poſteriore ſe audiendum putauit, cùm aduerſus Platonis de Repub. libros ſcripſit, cùmque ſophiſmata ſoluit, ac proinde diſcipulos uſu dialecticam assumere, ut pote ad diſſoluendas captiones valentem. Atqui ſiue Plato demonſtrauit, ſiue non demonſtrauit ea, quæ in libris de Repub. tradidit, neutro ſanè pacto non modò neceſſe non fuit Zenonem, velut poſteriore dicturum, contra ea ſcribere, ſed etiam ſuperuacaneum prorsus ac inane. Hoc idem de Sophiſmatum ſolutione licet dicere.

CHRYSIPPVS putat, iuuenes audire debere primùm Logica, deinde Moralia, poſtea Phyiica: his autẽ conſequenter diſputationem de Diis vltimam assumere.

Hæc

Hæc quamuis multis in locis ab eo dicantur, satis tamen erit apposuisse, quæ quarto de vitis libro his verbis scripta reliquit:

” Primum itaque mihi videtur, quomodo veteres rectè dixerunt, tria esse præceptorum genera, quæ ad Philosophum pertineant, Logica, Moralia, Naturalia. Deinde ex his primo loco poni oportet Logica. secundo Moralia, tertio Naturalia. Naturalium verò ille de Diis tractatus ultimus instituat

” oportet: unde veteres etiam appellarunt huiusmodi traditiones. Verum hanc de Diis partem, quam ait ultimam poni oportere, illic præponit, ac ante omnes morales quæstiones exponit. Neque enim de finibus, neque de iustitia, neque de bonis malisque rebus, neque de nuptiis, liberorumque educatione, neque de lege Rêque publica, verbum ullum facit, nisi quatenus ij, qui scita in urbibus rogant, præscribunt Bonam fortunam, eatenus ipse quoque præscribit Iouem, Fatum, Providentiam, Mundum

dum hunc vnum & finitum vna vi contine-
ri. Quorum nihil, nisi medijs de natura di-
sputationibus permixto, altéque temperato
persuaderi potest. Sed audi, quæso, quæ de
his in tertio de Dijs libro dicit: Aliud enim
principium, aliúsve ortus iustitiæ nullus
reperiri poterit, quàm is, qui à Ioue natu-
raque communi ducatur. Hinc nanque opor-
tet omne, quod huiusmodi est, originẽ suam
trahere, si quicquam modò de bonis malisq;
rebus dicturi sumus. Rursus in naturali-
bus positionibus: Aliunde enim, aut certè à
commodiore principio accedi non potest ad
disputationem de bonis & malis rebus, de
virtutibus, de felicitate, quàm si à commu-
ni natura, atque à mundi gubernatione pro-
ficiscatur oratio. Et infra: Oportet siqui-
dem his connectere disputationem de bonis
& malis rebus, cùm non sit aliud earum
conuenientius initium, vnde aptentur, quò-
ve referantur: nec scientia naturalis alia de
causa debeat addisci, quàm vt, quomodo
distent

„ distent à malis bona, cognoscamus. Sic Chrysippo simul ante, & post moralia naturalis disciplina ponitur. Quinimo prorsus implicita est ordinis inuersio ac confusio, si post hæc est illa statuenda, sine qua nihil eorum comprehendere potest: manifestaque est secum digladiantis hominis pugna, qui ponit naturalem scientiã principium illius, quæ est de bonis & malis, rursus verò iubet eam non post, sed ante illam tradi. Quod si quis dixerit, Chrysippum in commentario de rationis usu scripsisse, quòd non sit omnino abstinendũ à reliquis ei, qui logicam primo loco addiscit, sed & ex illis, quantum res fert, assumẽdum: vera quidem is dicet, sed eadem oratione nostram confirmabit reprehensionẽ. Nam secum pugnat Chrysippus, alibi iubens disputationẽ de Deo assumere vltimã, seu τελευταϊον, vt quæ propterea τελετη nominetur: rursus alibi dicens, eandem simul cum primis assumẽdam. Hoc nanque modo perit ordo, si omnia in omnibus

omnibus locis sunt inculcanda, si in singula ex cæteris omnibus aliquid hauriendū. Imò, quod maiore repugnantia habet, dicā. Cū disputationis de bonis ac malis instituendæ exordium fecisset illam de Diis quæstionem, non iubet, ut ab hac de Dijs incipientes, illā de moribus aggrediamur: sed hanc aggredientes, illam de Dijs, prout res postulabit, adhibeamus: deinde ab illa de moribus ad hanc de Dijs transitum faciamus: sine qua tamen negat ullum ad illam principium, aut adiumentum suppetere.

ILLAM in utranq; partem differendi rationem negat se quidem in totum reiicere, verū ea cautè utendum esse monet, scilicet ut, quomodo in iudiciis fieri solet, sic in disputationibus nō defendamus, sed dissoluamus contrariorū probabilitatem. Nam qui assensus retentionem in omnibus probant, eos par esse ait hoc facere, cū ipsorum instituto conveniat & conducat. Illis sanè, qui sciētiā, qua constāter vivamus docere atq; indere

- „ indere volunt, conuenit cōtraria suis separa
 „ tē ordinibus disponere, eósq; qui introducun
 „ tur, certa via ac limite à principio ad finem
 „ vsq; dirigere, ita vt, vbi res postulat, etiam
 „ cōtrariorum argumentorū fieri mētionem,
 „ ibi sanē fiat, sed cum probabilitatis ipsorum
 „ dissolutione, quomodo in iudiciis fieri solet.

Hæc enim sūt ipsa Chrysippi verba. Quòd
 itaque sit absurdū, Philosophos contrarias
 disputationes exercere debere, non cum
 assertione, sed causidicorum more, cum ve-
 xatione damnóque veritatis, quasi non veri-
 tatis inueniēdæ, sed victoriæ pariendæ cau-
 sa contendere debeant, dictū est alibi contra
 Chrysippum. Quòd verò ipse non in pau-
 cis, sed in plerisque locis contrarias iis, quas
 approbat, disputationes tã validè, studiosè,
 ambitiosèq; confecerit, vt nō sit cuiusuis ho-
 minis assequi, quid ipsi probetur, ipsi certè
 Stoici dicunt, admirantes vim viri, putātēsq;
 Carneadē nihil, quod suū sit, dicere, sed ex
 iis, quibus quid in cōtrariā partē dici posset,
 Chrysip

Chrysippus tentauit, ex iisdem, inquam,
principiis profectum dissertationes ipsius
inuadere, sapéque interea citare,

Δαίμονι φθίσει σε τὸ σὸν μένος.

Conficiet diuine tuum te robur.

Quippe qui magna præbeat argumenta
cōtra sese iis, qui placita conuellere, ac dissi-
cere velint. De eis verò, quæ contra cōsuetu-
dinem edidit, ita se iactitant, ac magnificè
loquuntur, vt ne, si omnes quidem omnium
Academicorum libri congerantur eòdem,
dignos esse dicāt, qui cum disputatis Chry-
sippo contra sensus conferantur. Hoc cū
dicunt, suam imperitiā, aut sui amorem pro-
dunt. Illud certè verū est, quòd, cū voluis-
set rursus consuetudini, & sensibus patro-
cinari, se ipso fuit inferior, scriptūque
scripto infirmius edidit: adeò vt ipse secum
pugnaret, semper quidem iubens opponere
contraria, non cum defensione. sed cum de-
monstratione quòd sint falsa: ipse tamen se
grauiore præbens suorum decretorum
refuta

refutatorem, quàm defensorcm. Item alios
quidem monens, vt contrariam disputatio-
nem vitent, quippe quæ comprehensionem
reuellat, ipse verò studiosius eam tollentia,
quàm confirmantia colligens. Atque quod
hoc ipsum reformidet, apertè satis ipse de-
clarat libro quarto de vitis, cum ita scribit:

„ Nequaquam temerè, & quomodolibet con-
„ traria disputatio proponenda est, aut ad
„ contraria probabilia respondendum, sed
„ cautè, ne ab iis ablati comprehensiones di-
„ mittant, eò quòd neque satis intelligere,
„ possint eorum solutiones, neque ita cõpre-
„ hendant, quin ipsis comprehensa facile pos-
„ sint excuti. Nam illi etiam, qui ex con-
„ suetudine comprehendunt, & sensa, & re-
„ liqua ex sensibus orta, tum Megaricis, tum
„ compluribus aliis validioribus interroga-
„ tionibus circumacti facile produnt. Liben-
„ ter itaque Stoicos percontarer, vtrùm Me-
„ garicas interrogationes validiores putent
illis, quæ sunt à Chrysippo contra consue-

tudinem sex libris conscriptæ. An verò
isthuc ex ipso Chrysippo exquirere oportet? Attende siquidem, quid de Megarica
ratione scribat in libro de rationis usu ad
hunc modum: Quale quiddam euenit in
Stilponis, ac Menedemiratiocinandi modo.
Nam, quamuis fuerant ij viri sapientia
clari, nunc tamen argumentandi ratio, qua
utebantur, in ipsorum ignominiam conuer-
sa est, ut negotium hominum partim cras-
sius, partim apertè captionibus utentium.
Has quidem, optime vir, conclusiones, quas
derides, vocasque probra eas proponen-
tium, ut quæ manifestum vitium aut ma-
litiam in se habeant, nihilominus times,
ne aliquos à comprehensione abducant.
At verò tot libris à te ipso contra consue-
tudinem scriptis, quibus addidisti, quic-
quid post inueneras ipsum Arcesilaum
superare contendens, existimaſti te le-
ctorum neminem conturbaturum? Ne-
que enim Chrysippus nudis modò epiche-
remati

rematibus contra consuetudinis autorita-
tem utitur: sed, ut in causa forensi, com-
motis affectibus, ipse quoque commotus,
eam sæpe dicit stulta, ac vana loqui. Ne
vllam itaque sibi reliquam defensionem
faceret, qua neget se sibi contraria dice-
re, in Naturalibus positionibus hæc scri-
psit: Licebit verò etiam comprehendē-
tem aliquid in contrariam partem dispu-
tare, ac quæ rei inest, defensionem ad-
hibere: nonnunquam verò, quamvis neu-
trum comprehendat, ad vtrunque tamen,
quæ suppetunt differere. Porro cùm in
libro de rationis usu dixisset, non oportere
rationis vi ac facultate in rebus non conue-
niētibus abuti, quomodo nec armis, hæc sub-
iecit: Nanque ea oportet uti ad inveniē-
verī, ac verissimilium, quæ sunt vero cogna-
ta: minimè autem ad contrariorum excogi-
tationem, quamvis multi hoc faciant. Mul-
tos nimirum appellat, eos qui assensum in-
hibent. Atqui illi quidem neutrum con-

trariorum comprehendentes ad vtrunque
disputant, quasi hoc vno, aut potissimo mo-
do, siquidem est aliquid comprehensibile,
veritate sui comprehensionem praebente.
Tu verò Chrysippe, qui illos accusas, osten-
diste in rebus inutilibus ac obfuturis ratio-
cinandi facultate abutentem ex ambitiosa
contentione iuueniliter lasciuire, & cum
contraria scribis, eis quæ de consuetudine
comprehendis, & cum alios hoc cum defen-
sione facere communes.

AIVNT Stoici, perfectum quod est,
officium esse legis iussum: delictum verò le-
gis prohibitionē. Quare legem multa malis
interdicere, nihil verò faciundum imprae-
re. Neque enim possunt rectè facere. At-
qui quis nescit fieri non posse, quin peccet
is, qui rectè facere nequit? Sic efficiunt, ut
lex ipsa secum pugnet, imperans ea, quæ
homines facere non possunt, contraque ve-
tans, à quibus sibi temperare nequeunt.
Nam qui non potest temperatè viuere, vi-
uat

uat intemperanter oportet: quique sapere
nequit, desipiat necesse est. Quid quod
ipsimet dicunt, eos qui vetant, aliud dicere,
aliud vetare, aliud imperare? Quippe qui
dicit, ne fureris, hoc ipsum dicit, ne fureris:
vetat verò furari. Nihil itaque malis lex
interdicit: alioquin imperabit aliquid. Ac
Medicum dicunt imperare discipulo, ut se-
cet, ac vrat, omiſſis aduerbiis, opportunè,
ac mediocriter. Item Musicum iubere di-
scipulo, ut lyram pulset, & canat, citra il-
las adiectiones, scitè & consonè. Quare
plectunt eos, qui hæc iussa inscitè & prauè
obeunt. Nam ut rectè fierent, imperata
sunt: isti verò non rectè sunt exequuti. Ita-
que & sapiens cum seruum iubeat aliquid
dicere, facerè ve, eumque deinde, quod non
opportunè atque decenter imperium fa-
cessit, puniat: certum est, quod tale officium
imperarit, quod medium non sit, sed perfe-
ctum. Quod si magnum quid sapientes
imperant vitiosis, quid vetat legis imperia

talia esse? Quid quòd autore quidem Chrysippo appetitio sit hominis ratio, ipsi, vt aliquid faciat imperans, quomodo in libro de lege scripsit. Sequitur itaque auersionem esse rationem vetantem, & declinationem esse cautam declinationem. Quapropter & cautio est ratio vetans sapientem, cùm ea sit non stultorum, sed sapientum propria. Quòd si igitur aliud quiddam est sapientis ratio, aliud ipsa lex, fiet, vt sapientes habeant rationem, quæ est cautio, legi contrariam. Sin nihil aliud est lex, quàm sapientis ratio, reperimus legem vetantem sapientes facere, quæ cauent.

Ait Chrysippus nihil esse stultis utile, stultorum neminem vsum habere, aut indigere. Postquàm hæc dixit in officiorum rectorum primo, rursus ait, & commoditatem, & gratiam ad media officia pertinere, quorum nihil, ipsorum sententia, sit utile. Sed nec natura accommodatum,

„ datum , nec conueniens quicquam stulto
„ esse his verbis ait : Per se verò, & spon-
„ te sua , nec virtute ornato alienum quic-
„ quàm , nec ea vacuo quicquàm conueniens
„ est : quandoquidem hoc bonum est , illud
„ malum. Quî fit ergo , quòd hæc , quæ
etiam moralis Philosophi propria sunt , in
omnibus naturalis scientiæ libris ad fasti-
dium vsque repetit , quòd statim ab ortu
nobis ipsis partibusque ac natis nostris
conciliamur ? Sed & in libro primo de
iustitia , feras , ait , piscibus exceptis , fœ-
tibus suis conuenienter pro ipsorum indi-
gentia conciliatas esse. Nam fœtus ipsi
a parentibus nutriuntur. Verùm nec
sensus est eis , quibus nullum est sensile :
nec conciliatio , quibus nihil est accommo-
datum natura. Nam conciliatio videtur
esse sensus , & apprehensio eius rei , quæ
natura sit accommodata. Atque hoc de-
cretum omnium præcipuis consentaneum
est.

Item Chrysippus satis ostendit, se huic
decreto accedere, licet multa contra id scri-
psit. Neque vitium vitio, aut peccatum pec-
cato maius esse, neq; virtutē virtute, aut re-
ctum officium aliud alio præstantius: quo-
modo sanè scribit in tertio de natura: Ut
Ioui conuenit de se, vitæque sua gloriari,
magnificè sentire, ac, si licet ita loqui,
ceruicem erigere, capillum nutrire, magna
verba iactare, cū dignam iactatione vi-
tam vixerit: sic omnibus bonis hæc eadem
conueniunt, ut pote qui nulla in re à Ioue
superentur. Verū ipse rursus in tertio
de iustitia scribit, eos iustitiam tollere,
qui voluptatem statuunt finem: qui verò
eam bonum modò dicunt esse, non item.
Sic se verba habent: Fieri siquidem potest,
ut quāuis voluptati tribuamus, ut bonum,
non etiam finis sit, cū ex rebus propter
se experendis sit etiam honestum, seruemus
nihilominus iustitiam scilicet, ut definiamus
honestum, & iustitiam esse maius bonum
voluptate.

voluptate. Quòd si quod honestum est,
id solum bonum est, peccat quidem certè,
qui voluptatem dicit esse bonum: verùm
minùs eo peccat, qui eàdem bonorum finem
constituit. Hic siquidem tollit è medio iu-
stitiam, ille servat hic communionem so-
cietatèmq̃ue vitæ, vt rem cassam, exter-
minat, ille verò probitati ac humanitati
locum relinquit. Prætcreà vt illa in li-
bro de Ioue dicta, Virtutes augeri, &
transire, prætermittam, ne verba videar
reprehendere, tametsi in hoc genere,
& Platonem, & reliquos Chrysippus
acerbè mordeat: sanè cùm vetat nos om-
ne omninò cum virtute factum laudare,
aliquam officiorum inter ipsa differen-
tiam indicat, vt cùm in libro de Ioue
» sic differit: Quæ nanque cum virtute
» fiunt, ea sunt hominum naturæ amica. Ho-
» rum etiam sunt, quædam producta, cu-
» iusmodi, exempli gratia referantur, digi-
» tum fortiter extendissè continenter ab-

stinuisse capulari vetula, citra errorem
intellexisse, tria non esse quatuor plenè. Ta-
lium profectò rerum nomine, qui aliquem
laudare instituit, frigeat necesse est. Ho-
rum porrò similia sunt illa, quæ in ter-
tio de Dijs commentario dicta sunt: Nam
arbitror etiam laudes alienas fore digni-
tate, ac natura rerum huiusmodi, quæ à
virtute tamen proficiscuntur, puta quòd
aliquis abstinuit anu moribunda, quòd
muscæ morsum tolerauit. Ecquem ergo
alium expectat iste decretorum suorum
reprehensorem? Nam si talium rerum
laudator friget, multò certè magis fri-
get, qui harum singulas posuerit rectum
officium & magnum & maximum.
Nam si paria sunt hæc, fortiter facere,
& muscæ morsum perferre: temperanter
vivere, & anu abstinere: nihil arbitror
interesse, hæccine propter, an illa, studio-
sum virum laudemus. Item secundo de
amicitia libro, docens non oportere ob quæ-
libet

libet peccata dissolvere amicitiam, his
» verbis utitur: Nam conuenit ad quæ-
» dam prorsus conuiuere, quibusdam pa-
» rum, quibusdam etiam magis attendere:
» quædam verò prorsus amicitie dissolu-
» tione dignari. Sed & quòd maius est,
eodem libro dicit, debere nos cum qui-
busdam maiorem, cum quibusdam mino-
rem amicitiam contrahere, ut nobis alij
sint alius amiciores. Verùm enimuero
longius huiusmodi varietate procedente,
siquidem hi tali, illi tanta amicitia, rur-
sus alij tantillo fidei & similium digni
iudicabuntur, quid aliud hîc Chrysippus
effecit, quàm ut istarum etiam rerum ma-
gnas differentias relinqueret? Quinetiam
in commentario de honesto, ut probet
solum bonum esse, quod honestum sit,
huiusmodi conclusionibus utitur: Quod
bonum est, id legendum est: quod ta-
le est, id placet. Quod verò placet, est
laudabile: hoc autem honestum est. Item
hoc

hoc modo : Quod bonum est, id gaudium affert. Quod gaudium affert, magnificum est: hoc verò est honestum. Sed hae rationes pugnant cum illa. Siue enim omne bonum est laudabile, etiam illud à vetula sibi temperare, esset laudabile: siue non omne bonum est magnificum ac gaudio dignum, *διχρηται* conclusio. Sedenim fieri potest, ut frigidum sit ac ineptum, ob res huiusmodi laudare alios: ipse tamen Chrysippus deridiculus non sit, si de talibus rebus gaudeat ac gloriatur. Ac cum in multis quidem talis disputator est, tum verò in contradictionibus aliorumque refutationibus ne sibi contrarius sit, minimum laborat.

NAM IN commentariis de exhortando, cum reprehendit Platonem dicentem non esse vitam vitalem ei, qui neque ab alio didicit, neque ipse scit vivere, his ipsis verbis utitur : Talis enim oratio & ipsa secum pugnat, & minimè omnium est adhortatoria. Primum enim cum ostendit nobis optimum

„ *timum esse non viuere, censetque quodam-*
 „ *modo moriendum esse, ad alia potius nos*
 „ *adhortabitur, quàm ad philosophandum.*
 „ *Neque enim philosophari potest mortuus:*
 „ *sed nec is sapiens euadet, qui diuturnam*
 „ *quidem, sed malignam & imperitam vitam*
 „ *produxerit. Et infra: Etiam malis con-*
 „ *uenit in vita manere. Deinde hæc ipsa ver-*
 „ *ba scribit: Primum enim virtus nuda nihil*
 „ *affert, quare viuere velimus. Eodem mo-*
 „ *do nec vitium tantum momenti habet, vt*
 „ *propter id vita cedere debeamus. Hic cer-*
 „ *tè non est necesse nobis alios libros euolue-*
 „ *re, vt ostendamus Chrysippum sibi repu-*
 „ *gnare, cùm in his ipsis commentariis mo-*
 „ *dò illud Antisthenis cum laude proferat,*
 „ *Oportere nos aut mentem, aut res tim com-*
 „ *parare. Item illud Tyrtæi,*

Mentis, quàm mortis, meta tenenda prior.

Verùm quid aliud hæc sibi volunt, quàm
mortem vita conducibiliorem malis ac stul-
tis

ris esse? Modò illud Theognidis corrigens
dicat, non oportuisse Theognidem scribere,
Pauperiem fuge,

*Sed multò potius ita,
Sic vitium fuge, Cyrne, ut tu vel in æquora vasta,
Rupè que de aëria præcipitare velis.*

Quid ergo aliud facit Chrypsippus,
quàm ut quas res ac sententias ipsemet ap-
probet, ac scribat, easdem ab aliis scriptas
expungat ac deleat? Nam & Platonem
reprehendit, quòd ostendat conducibilius
esse omninò non vivere, quàm malè, & stul-
tè vivere, & contrà Theognidi consulit, ut
vitandi vitij ergò de saxo se præcipitet, &
in mare abiiciat. Sic quamvis Antisthenem
laudet, quòd stultos ad laqueum compellit,
illum tamen reprehendit, qui dixit tanti non
esse vitium, ut propter id vita sit excedendum.

In illis verò, quæ contra Platonem ipsum
de iustitia scripsit, statim à principio inua-
dit illam de Diis disputationem, dicitque
nec Cephalum rectè nos ab iniuria Deo-

rum

rum metu auertere, confutatuque facilem
esse ipsam de vindicta diuina disputatio-
nem, ac multas in contrariam partem di-
strahentes probabilitates ex se proferre,
ut quæ nihil differat ab Acco, & Alphi-
to, quarum terrore pueros prauo otio mu-
lieres arcere solent. Postquam Platonem
sic derisit, alibi rursus laudat, sæpèque ci-
tat illa Euripidis:

Sed est Iuppiter, suntque Dii mortalium
Mala aspecturi, si quis hæc dicta ridet.

Quomodo etiam Hesiodia illa protulit
in primo de iustitia:

Iuppiter hisce malū de cælo immiserat ingēs,
Atq; famē, atq; simul pestē, populos populātes.

Hæc ait Deos idcō facere, quō malorum
supplicio deterriti probi minùs tentent im-
proborum facta imitari.

ITEM IN commentariis de iustitia,
cū hoc præmisisset, Quod ij, qui voluptatē
ponunt bonum esse, non etiam finem. possunt
etiam iustitiam tueri: hoc, inquam, cū po-
» suisset, illa ipsa verba subiunxit: Fortassis
enim

enim quamvis voluptas bonum, non etiam
finis, ponatur: cum ex rebus propter se ex-
petendis sit etiam honestum, tueri poterimus
iustitiam, modò quod honestum, &
iustum est, id voluptate maius bonum esse
definiamus. Atque hac quidem in illis de
iustitia commentariis de voluptate scri-
psit. In aliis verò contra Platonem, cum
eum reprehendit, quòd videatur sanitatem
dicere bonum, ait nos non solum iustitiam,
verum etiam animi magnitudinem tollere,
& temperantiam, reliquasque omnes vir-
tutes, si voluptatem, aut sanitatem, aut
quicquam aliud eorum, quæ honesta non
sunt, bonum ponamus. Quæ itaque pro
Platone contra Chrysippum dici debeant,
alibi scripta sunt. Verum hoc loco manife-
sta est repugnantia, cum nunc dicit iusti-
tiam servari, si ponatur cum honestate
etiam voluptatem esse bonum: rursus eos o-
mnes sublata virtutis accusat, qui aliud
quicquam, quàm quod honestum sit, bonum
esse

esse statuunt. Ac ne ullam suam sibi repugnantiam iustam depulsionem relinquat, ubi aduersus Aristotelem de iustitia scribit, negat cum recte dicere, quod tollitur iustitia, & cum ceterae virtutes omnes, si voluptas statuatur finis. Nam Chrysippus ait, iustitiam ab ipsis reuera tolli, reliquas tamen virtutes posse saluas restare, ita quidem ut quamuis per se non fuerint expetendae, bona nihilominus, & virtutes sint futurae. Deinde unamquamque suo nomine appellat. Sed eius verba
» praestat ascribere: Nam per huiusmodi
» rationem, ut appareat voluptas esse finis,
» non tamen, mea sententia, totum hoc genus
» reliquarum virtutum sublatae iustitiae includetur. Quare dicendum est, nec virtutem ullam propter se expetendam esse,
» nec vitium fugiendum, sed haec omnia ad
» propositum scopum, seu finem referenda,
» spectandaque esse. Nihil tamen prohibebit, quod minus per se sint virtutes, & in bono-

rum numero fortitudo, prudentia, continentia, tolerantia, & si quæ sunt aliæ generis eiusdem, contrariæ verò res fugiendæ sint. Ecquis ergo fuit vnquàm isto ad disputationum concertationes improbius audax? qui duos præstantissimos Philosophos increpuit, alterum, quòd totã virtutem tollat, non ponens id solum bonum esse, quod honestum sit: alterum, quòd, voluptate sine constituta, reliquam virtutem omnẽ, excepta iustitia, seruari non posse arbitretur. Mirifica hominis licentia, differentis ita de rebus eisdem, vt quæ ipse ponit aduersus Aristotelem, ea ipsa rursus contra Platonẽ disputans euertat. Atqui in demonstrationibus de iustitia disertè dicit, omne rectũ officium, & legitimam actionẽ, & iustam actionem esse. Quod autem cum continentia, aut tolerantia, aut prudentia, aut fortitudine fit, est rectũ officium: quare erit etiam iusta actio. Qui fit ergo, vt quibus prudentiã, & fortitudinem, & continentiam relinquit, nõ etiam iustitiam

stittiam eisdem relinquat? cū omnes quæcunque cū officio in aliquo genere dictarum virtutum faciunt, statim & cum iustitia faciant.

Quod verò Plato dixit, iniuriā, quæ sit animi pestis ac perturbatio, nec in ipsis ea præditis vim suā amittere, sed ipsū malū & iniustū hominē secum cōmittere, collidere, ac perturbare, reprehendēs Chrysippus ait absurdè dici, seipsum iniuria afficere, cū iniuria in alterum non in facientem tendat. Verū horum oblitus contrā scribit in demonstrationibus de iustitia, eum qui iniuriā infert, ipsum à se affici iniuria, seque ipsum violare, quoties alium lædit: quippe extitit ipse sibi in legem peccandi causa, seque ipse indignè læsit. Ac in scriptis quidem contra Platonem, quòd iniuria in alterum, non in seipsum dicatur, illa literis mādauit: Nam qui
 „ privati sunt iniuriy, cōstant ex pluribus simi
 „ libus cōtraria dicentibus: cū & alioqui sic
 „ accipiatur iniuriæ vocabulū, quasi pluribus

insit iniuriosè erga se ipsos affectis, in vnum
verò nihil tale competat, sed quisque sit in-
iurius quod ad eos attinet, quibuscum con-
trahit. Contrà verò in demonstrationibus
ita colligit, iniurium etiam seipsum iniuria
afficere: Lex vetat, quenquam esse dolo ma-
lo causam adiuvantem violandi legem. Sed
iniuria est delictum, seu legis violatio. Qui
itaque causa sibi ipse dolo extitit iniuriã in-
ferendi, in seipsum legẽ egreditur. Qui au-
tem in aliquem delinquit, contra legem eun-
dem iniuria afficit. Qui itaq; quemvis afficit
iniuria, etiam ipse scmet afficit iniuria. Rur-
sus: Peccatum est è genere dānorum, seu læ-
sionum, & quicumq; peccat, in se ipsum pec-
cat. Quare quicumq; peccat, ipse se indignè
lædit. Quod si hoc est, iniuria sese afficit.
Præterea & sic concludit: Qui in alterius
personale legem violans læditur, ipse se lædit.
Hoc autem est afficere iniuria. Quare qui
iniuria afficit, etiam in quolibet omnis omni
no ipse se iniuria afficit.

DISPUTATIONEM de rebus bonis & malis, quã ipse introducit, ac probat, cõuenientissimã ait esse vitæ, maximèq; prænotiones insitas attingere. Atq; hæc quidem dixit in libro exhortationũ tertio. Verũ in primo ait, hanc disputationẽ abstrahere hominẽ ab aliis omnibus, tanquam nihil ad nos pertinentibus, neque ad felicitatem quicquam conferentibus. Vide itaque quomodo sibi cõsentanea dicat, pronũtians eum qui nos abstrahit à vita, sanitate, quiete, sensuum integritate, dicítq; has res nihil ad nos pertinere, quas à Diis petimus, eum, inquã, pronuntians vitæ ac communibus anticipationibus maximè consentire. Verũ ne repugnantiam negandi facultas esset, in tertio de iustitia hæc dixit: Quare propter excellentẽ magnitudinem, & pulchritudinẽ, fabulis ac fictis rebus similia, nec hominis naturæ ac ingenio congruentia, videmur dicere.

Quomodo quisquã clarius confessus fuerit, se sibi cõtraria dicere, quàm iste, qui scribit

ea congruere vitae, maximèque notitias insitas attingere, quæ tamen propter hyperbolen aut figmenta videri, ac supra hominẽ, supraque humanum ingenium dici?

Pronuntiat Chrysippus naturã infelicitatis esse vitium. Sic enim in omnibus libris naturalibus, ac moralibus scribit, ac contendit, vitiosam vitã, & infelicem vitam esse prorsus eandẽ. In tercio verò de natura, cum præmisisset, quòd conducibilius sit, amẽtem & ex corde viuere, quàm nõ viuere, quãuis sapiens nunquam sis futurus: subiicit: Talia cc
siquidẽ bona sunt hominibus, vt quodãmodo cc
mala sint mediis priora. Quod itaq; cum in cc
aliis scriptis dixisset, nihil vtile stultis esse, cc
hìc cõtrà dicat, stultã vitam cõducere, id si-
ne maiori reprehẽsione prætermitto. Quod
verò mediis, quæ apud Stoicos, nec mala, nec
bona sunt, mala præualere dicit, nihil aliud
dicit, quàm non malis mala præualere, ac
quod infelix est, conducibilius esse eo, quod
est nõ infelix. Sic quod est nõ infelix, arbitra

tur

tur incommodius , ac proinde dānosius esse
infelici. Cū vult igitur hanc absurditatem
„ extenuare, hæc de malis subiicit: Non sunt
„ autē hæc præualētia, sed ipsa ratio, cum qua
„ viuere magis cōuenit, et si stulti simus futu-
„ ri. Primū itaq; vitium appellat mala, quæq;
vitium participant: aliud prætereā nihil. Vi-
tium verò est rationale, vel potius ratio aber-
rans, ac deprauata. Nihil igitur aliud est, cū
ratione stultos viuere, quàm cum vitio vi-
uere. Deinde viuere stultos, est viuere infe-
lices, ac miseros. Quousque itaque hoc an-
tecedit media? Non enim vsque ad felici-
tatem, ait Chrysippus, hoc præcedere in-
felicitatem. Sed nec vllo modo, aiunt Stoi-
ci, Chrysippus arbitratur aut mansionem
in vita, bonis, aut abitionem malis annu-
merandam esse, sed in genere rerum, quæ
natura mediæ sunt, collocandam. Quare &
felicibus aliquando conuenit sese vita edu-
cere, contraque infelicibus in vita per-
manere. Deinde quæ maior hac reperiri

potest repugnantia in isthac expetitione
declinationeque rerum, quàm conuenire
summè fœlicibus, propter defectum alicu-
ius rerum indifferentium bonis præsentibus
absistere, & indifferentium nihil eligendum
aut fugiendum esse, sed solum id quod bo-
num est eligendum, solum malum fugien-
dum? Atque vtrunque putant Stoici. Fit
itaque eorum sententia, vt neque ad res
expetendas, neque ad fugiendas, actionum
suarum consilia accommodent, sed alior-
um dirigentes pro earum rerum ratione,
quas neque fugiunt, neque expetunt, & vi-
uant, & moriantur.

CONFITETVR Chrysippus ma-
ximam differentiam esse bonorum, & ma-
lorum, quod & necessarium est: siquidem
hæc in extremam infelicitatem statim dei-
ciunt, illa ad summam felicitatem euehunt
eum, ad quem accedunt. Bona verò &
mala esse sensilia, secundo de fine his verbis
scribit: Quòd enim sensibilia sint bona & ^{et}
mala,

41
» mala, & his asciscit dicere: Nam non so-
» lum veri affectus, eorūque species, putā
» dolor, metus & cætera generis eiusdem,
» sensu percipi possunt, sed etiā furtum, scor-
» tatio, & similia sensum sui adferunt. Om-
» ninò enim stultitia, timiditas, & alia nō pau-
» ca vitia, itē non solū latitia, beneficentia,
» & aliorum multorū officiorum recta exe-
» quutio, sed etiam prudentia, fortitudo, &
» reliquæ virtutes sensum excitant. Ac ut
reliquam istarū sententiarum absurditatem
præteream, quis negabit, eas pugnare cum
illis, quæ de suo Sapiente non sentiente di-
cunt? Quomodo, quæso, non est hoc longè
absurdisimū: Eum, qui fit ex malo bonus,
ignorare præsens bonū & sensibile, & ma-
gnam cū malo differentiam habens, tamq;
non sentire adesse sibi virtutem, ut etiā
vitiū sibi adherere putet? Aut enim igno-
rare dubitarē nemo potest, utrū sit vir-
tutibus præditus omnibus: aut exigua quæ-
dā, prorsusque perspectu difficilis est dif-

ferentia virtutis & vitij, felicitatis & infelicitatis, honestissimæ & turpissimæ vitæ, si quis in se harum rerum commutationem non sentiat.

IN VLTIMO vnius illius de vitis corporis quatuor cōplexi libros ait Chrysippus, Sapientem non esse curiosum, sed rerum tantum suarū satagere. Sunt autem hæc eius verba: Equidem arbitror prudentem & minimè curiosum esse, & paucorum curam agere, & sua negotia gerere, cū sit eiusdem sapientiæ, sua tantum, & pauca curare. His propemodum similia scripsit in libro de rebus propter se expetēdis, hisce verbis: Videtur enim reuera tranquilla & quieta vita extra periculum & lapsum collocata esse: id quod vulgus hominum non potest valdè perspicere. Quòd quidem ab Epicuro providentiam tollente propter otium, quo Deum beat, non valdè differat Chrysippus, hīc manifestum est. Verūm idem in primo de vitis ait, Sapientem sponte
sua

43
sua suscepturū regnū, vt inde lucretur, ac si
non potest ipse regnare, conuersaturū con-
uicturūque cum Rege, itémq; vnà milita-
turum: quales reges erant Hydanthyrsus
Scythia, & Leucon Ponticus. Apponā &
hanc ipsius dictionem, vt videamus utrū
quomodo ex nete & hypate fit consonātia,
sic sibi consentanea sit vita hominis, qui eam
incuriosam & paucorum satagentem eli-
git, sed postea cum Scythis equitat, & Bos-
phoranorum tyrānorum res procurat, qua-
licunque tandem necessitate adigente. Ait:

- ” Quod enim Sapiens militabit, viuetque
” cum regibus, rursus inspiciamus his con-
” sequenter, aliquibus sanè ne hæc quidem
” sentientibus propter similes causas, nobis
” tamen etiam hæc Sapienti concedentibus
” propter finitimas rationes. Et paulò post.
Neque modò cum progressis aliquantum
ad virtutis aditum, ac compositis certa vi-
tæ ratione ac moribus, vt cum Leucone &
Hydanthyrsō. Callisthenē aliqui reprehē-
dunt,

dunt, quòd ad Alexandrum nauigarit spe
 Olynthi instaurandæ, Aristotelis exem-
 plo, qui Stagiræ restitutionem impetrauit.
 Ephorum, Xenocratem, Menedemum lau-
 dant, quòd Alexandri consuetudinem refu-
 tarunt. At verò Chrysippus lucri gratia in
 caput præcipitem dat Sapientem in Panti-
 capæum, & Scytharum solitudinem. Quòd
 enim quæstus faciendi gratia Sapientē suum
 ita tractet, etiā antè demonstrauit, cū tria
 lucri genera Sapienti maximè conueniētia
 demonstrauit, ex regno putà, ex amicis, &
 ad hæc tertium, quod ex sapientiæ vendita-
 tione existit. Atqui cū multis in locis ad
 fastidium vsque hæc laudat,

Nam quid mortali, ni duo sola?

tum verò in commentariis rerum natura-
 lium dicit, Sapientem, etsi maximas fa-
 cultates amittat, arbitraturum tamen se
 drachmæ vnius iacturam fecisse. Isto pacto
 Sapientem illic attollit atq; exaggerat, rur-
 sus hîc in mercenariam vitam, ac sapien-
 tiæ

tiae venditationem abiicit. Ait nanque eum
petiturum & præcepturum mercedem, mo-
dò statim à primo, modò veniente die di-
scipulo constituta. Ac hoc quidem poste-
rius ait humanius esse, illud verò, præci-
pere, tutius videri, quòd locus hic (dilatio-
nem dico) iniuriæ sit opportunus. Sic enim
„ scribit : Non omnes qui sapiunt, mercedem
„ eodem modo exigunt, sed aliter atque aliter
„ maior pars, prout res tulerit, non hoc qui-
„ dem promittentes se discipulum effecturos
„ bonum, idque anni spatio, sed illud modò
„ quod in ipsis situm est, ad constitutum tem-
„ pus se id curaturos. Et infra: Tempusque
„ dignoscet, utrum statim in ipso ingressu
„ mercedem accipere oporteat, quomodo
„ complures fecerunt, an verò dilationem
„ concedere: quod etsi videri possit humanius,
„ hic tamen locus iniuriæ magis obnoxius
„ est. Verum quomodo Sapiens pecuniarum
„ contemptor fuerit, si virtutem argento syn-
grapha cauto tradit, ac quamvis virtutem

non

non tradiderit, mercedulam tamen exigit, quasi suo functus sit officio? aut quî maior extiterit omni damno, si sollicitè cauet, ne in mercedula patiatur iniuriã? Nam nisi qui damno afficitur, iniuriam nemo patitur. Sic cùm in aliis scriptis pronuntiarit, Sapientem iniuriam pati non posse, hîc tamen ait locum istum, hoc est, dilationem iniuriã admittere.

In libro de Rep. ait, ciues voluptatis causa nihil facturos aut cõparaturos esse: laudatque Euripidem, cuius hæc citat:

Quo est opus mortali, ni duobus modò
Cereris fruge, &c.

Deinde paulò pòst laudat Diogenem in propatulo defricantem sibi penem, hæcque spectantibus dicentem, O si possem famem quoque hoc pacto à ventre depellere. Quàm constanti ergo ratione laudat eodem loco, & eum, qui voluptatem exterminat, & eum, qui voluptatis causa talia admittit, talique sese turpitudine contaminat?

Cùm

Cùm scripſiſſet itaque in libris de Natura,
quòd ea cõplures animantes pulchritudinis
gratia produxit, vt quæ pulchra amet, &
varietate delectetur, cùnque addidiſſet rem
alieniſſimã. pauonẽ caudæ cauſa, ob eius ſcili
cet pulchritudinem eſſe editũ: contrà libro
de Rep. vehemẽter eos accuſat, qui pauones
ac philomelas alunt, velut cõtrarius legiſla
tor mundi legiſlatori, ac deriſor naturæ cu
riose pulchritudinẽ exquirentis in huiusmo
di animãtibus, quibus Sapiẽs in ciuitate nul
lum locũ relinquit. Quĩ nanq; fieri poteſt, vt
quarũ auium matrem providentiam laudat,
earũ effæminatos altores nõ abſurdè accu
ſet? In quinto itaq; de natura, cùm dixiſſet,
galeritas percommode nos expergeſacere,
murẽſq; nos cogere ſingula diligẽter collo
care, tũ veriſimile eſſe naturã pulchritudi
nis ſtudioſam varietate delectari, his dein
de verbis uſus eſt: Huius rei argumentũ ma
ximũ apparuerit in pauonis cauda. Ibi ſiqui
dẽ oſtendit natura ipſam animantẽ factam
eſſe.

esse propter caudā, non contrā. Sic marē na-
 scentem sequuta est fœmina. In cōmentario
 autē de Rep. paulò pōst, quā dixit: Futurū
 mox est, ut etiā sterquilinia pingamus: sub-
 iungit, Rustica opera nōnulli topiario exor-
 nant, & myrtis, pauonēsq; & columbas
 alunt, nec non perdices, ut cacabent, itēque
 philomelas. Libenter certē interrogarem
 Chrysippū, ecquid de apibus, deque melle
 sentiat? Nam cōsequens est ei, quod dixit,
 Galeritas vtiliter, apes inutiliter à natura
 proditas dicere. Quòd si apibus in ciui-
 tate locum relinquit, quare ciues arcet ab
 ijs, quæ aures, oculósque delectant? In
 summa quemadmodum absurdè facit, qui
 conuiuas reprehendit, quòd bellariis, vino,
 obsoniis, utuntur, cū tamē laudat, qui ad has
 lautitias inuitauit, ipsāsque præparauit: sic il-
 le cōtraria sibi dicere nulli curæ habet, qui
 prouidentia quidē laudat, quòd pisces, aues,
 mel, vinum appararit: eos verò reprehen-
 dit, qui, rebus istis omisissis, non sint contenti,

Cerēris

*Cereris fruge, poculisque aqualibus,
quæ sunt & ad manum posita, & nos alere
nata.*

Item ubi dixit in exhortatoriis, quòd
hæc sine ratione sint accusata, incestus cum
matre, filia, sorore, & cibi genus aliquod,
& à coitu funeræue processus ad templum,
» subiicit: Etiam feras in exemplum nobis in-
» tuendas esse, ac ex earum consuetudine col-
» ligendum talium rerû, nihil nec absurdum,
» nec contra naturam esse. Per commodè si-
» quidem in his à feris exempla sumi, ut pute-
» mus neque coeuntia, neque generatîa, neq;
» morientia in sacris locis numen polluere.

Contrà libro quinto de Natura dicit, Hesio-
dum rectè quidem vetare, ne quis in fluuios
& fontes meiat: verû tamen tolerabilius ibi
meij, quàm ad aram, aut Dei statuam: nec
ad rem pertinere, quòd canes & asini hæc
faciant, aut pueri infantes, omni cura &
consyderatione talium rerum vacâtes. Ab-
surdum itaque est efferationem animalium

ratione carētium illic per commodam dicere, hīc verò à ratione alienam.

NON NVLLI Philosophi constitunt, ex eo quòd cogi quis videtur ab extrinsecus oblatis causis appetitiones dimittere, in rationali parte animi motum quendam aduētitiū, qui maximè cernitur in rebus dubiæ ac ancipitis electionis. Nam cū duæ res æquipollent, parcsque sunt, si alteram sumere sit necesse, nec sit causa, quæ ad alteram potius inclinet animum, cò quòd altera nihil differat ab altera, tunc vis hæc aduentitia, sumpto sibi animi inclinandi iure, dubitationem decidere solet. Aduersus hos Philosophos, vt in multis partibus per causarum sublationē naturæ vim asserentes, disputans Chrysippus, affert taxillum, & stateram, multaque eiusmodi, quæ nequeunt nunc hos, nunc illos casus & inclinationes accipere sine causa aliqua & differētia, quæ vel ex ipsis rebus, vel ex propinquis extrinsecus existat. Quodenim sine causa prorsus
teme

temeréque fiat, in rerū natura nihil esse. In
 istis verò commentitiis superuentionibus,
 quas ἐπελεύσεις vocāt, causas occultas sub-
 esse, quæ clam nobis impetū nostrum in alte-
 ram partē agunt. Atque hæc quidem sunt
 ex notissimis eius libris desumpta. Quæ ve-
 rò his ex aduerso cōtraria dixit, ea quoniam
 nō sunt in promptu ac omnibus exposita, nul-
 lo verbo cōmutato apponā. Nam in libro de
 iudicando cū finxisset duos cursores si-
 mul decurrisse, quærit, ecquid Præsidi cer-
 tamini faciundum sit. Vtrū, inquit, Præ-
 sidi licet vtri velit eorum dare purpuram?
 Sed & hoc positū sit, quòd Præsidi sint fa-
 miliariores, vt eis de suo aliquid potius lar-
 giturus penè videatur, quàm vt alterū frau-
 det re, quæ velut sorte dubia quasi commu-
 nis vtriusque sit facta. Vtrū, inquam,
 Præsidi licebit, ex fortuita inclinatione
 purpuram dare? Appello autem fortuitam
 inclinationem, qualis existit, quum, dua-
 bus drachmis cæteroqui similibus propo-

sitis, alteram, inclinatione ad eam facta, sumimus. In sexto autem de officio postquā dixit, nonnullas res esse multa cōsideratione aut attentione indignas, arbitratur debere nos in huiusmodi, electionem fortuitae mentis inclinationi, velut sorti, committere. Exēpli gratia, inquit, si ex probatibus has, puta duas drachmas, aliquāto tempore alij hanc, alij illam dixerint esse pulchram, una verò sit accipienda, tūc, omiſſa longiore cōsideratione, alterutram, quam forſ tulerit, secundū alicuius arbitriū sortitò capiemus, cū si sanè drachmam deterioſiorem capturi sumus. In his siquidem sortitio ac fortuita mentis citra vllam omnino causam motae inclinatio, indifferentium captionem inducit.

In tertio de Dialectica cū praeſiſſet, Platonē, & Aristotelē, cæterosq; deinceps vsq; ad Polemonem, & Stratonem studiosè Dialecticam excoluisse, studiosissimè verò Socratem: adieciſſetque, nec recusandū esse cōmunem cum tot ac talibus viris errorem:

subiun

„ subiungit hæc verba: Nam si obiter de Dia-
„ lecticis dixissent, aliquis fortassis hunc Phi-
„ losophiæ locum derisisset: sed cum tam se-
„ rio, tamque diligenter dixerint, quasi ex ma-
„ ximis, ea, maximèque necessariis facultati-
„ bus sint, non est probabile, viros illos tan-
„ tum errasse, qui in omnibus Philosophiæ par-
„ tibus tales reuera extiterunt, quales eos
„ fuisse taciti cogitamus. Quid tu itaque, di-
„ xerit quispiam, tot talibusque viris repu-
„ gnare nunquam desines: nullum eos arguen-
di in præcipuis, opinione tua, maximisque
rebus finem facies? Neque enim de Dialecti-
ca studiosè, de principio autem, de Diis, de
iustitia, aliud agentes ac ludibundi scripse-
runt. De quibus rebus eorum disputationem
appellas cæcam, sibi repugnantem, ac alia
sexcenta vitia habentem.

Gaudium ex alienis malis oriens alicubi
negat in rerum natura esse, quod id in stu-
diosorum ac elegantium virorum neminem ullo
modo cadat. Vcrum libro secundo de Bono,

exposita inuidiae natura, quòd ea sit dolor
 ex bonis alienis natus eis, qui cupiant utique
 deprimere proximos, quo ipsi excellent:
 coniungit ei gaudiū ex alienis malis nascens.
 Huic inuidiae connexa est voluptas ex alie- cc
 nis malis percepta, cū homines cupiunt cc
 alios ob similes causas deprimi. Misericordia cc
 porrò nascitur, cū homines emouentur mo- cc
 tibus aliis naturalibus. Hoc enim loco satis cc
 manifestè reliquit, ut inuidiam & miseri-
 cordiam, sic gaudium ex alienis malis, quod
 tamen alius in locis negat subsistere: ut &
 improbitatis odium, & turpis lucri studium
 inficiatur.

DIXIT Chrysippus multis in locis,
 temporis diuturnitatē ad felicitatis magni-
 tudinem nihil adferre, sed ex æquo felices
 esse, & eos qui longissimo temporis tractu,
 & eos qui impartili momēto beatitatis par-
 ticipes viuunt. Contrà dixit in aliis nec
 paucioribus locis, quòd ne digitum quidem
 extendere conueniat breuissimæ sapientiæ
 gratia,

gratia, quæ fulget & more trāsuolaret. Suf-
 ficiet appojuisse, quæ de hac re libro sexto
 moralium quæstionū scripsit. Nā cū præ-
 posuisset, nec omni bono gaudium, nec omni
 officio recto grandiloquentiā æquē cōueni-
 „ re: intulit illa: Nam si quis sapientiā non esset
 „ habiturus diutius temporis momēto, aut ex-
 „ tremo vitæ puncto, ne digitū quidem conue-
 „ niret exporrigere, ita potiunda sapientiæ
 „ gratia, quamvis longioris temporis spatium
 „ nihilomāgis homines beet, nec felicitas im-
 „ mortalis breuissimæ præferenda sit. Quod
 si itaque Chrysippus cum Epicuro putaret,
 sapientiam esse bonum felicitatis efficiens,
 ipsam solum dogmatis absurditatem, no-
 uitatēque reprehendere oporteret: nunc
 verò cū ei sapientia nihil aliud natura
 sua sit, quàm ipsa felicitas, quomodo, quæ-
 so, non pugnant hæc inter se, æquē eligen-
 dam breuissimam felicitatem, atque im-
 mortalem: verū breuissimam nulla re
 dignam esse.

Aiunt virtutes sese consequi, non ea solum de causa, quod, qui vnā habet, omnes habeat, sed & illa, quod qui cum vna quiduis facit, cum omnibus faciat. Negant etiam Stoici aut hominem perfectum esse, qui non omnibus virtutibus sit præditus, aut actionem perfectam, quæ non sit ab omnibus edita virtutibus. Verum Chrysippus sexto moralium questionum negat * sapientem semper se fortiter gerere, aut malum timidè, quasi oporteat, visis aliquibus obiectis, iudicia sua hunc tueri, illū deferere. Sed nec, inquit, credibile est, malum semper intemperanter agere. Itaque si fortiter se gerere nihil aliud est, quàm fortitudine vti, & ignauè agere idem valet, quod ignauia vti: profectò pugnantia dicunt, qui aiunt, præditū vna virtute vnòue vitio cum omnibus agere, nō tamen * fortem semper facere fortiter, nec timidè malum.

Rhetoricam definit, artem de ornatu, ac ordine pronuntiatae orationis tractantem.

Sed

aliis fortiter.

aliis facientem.

» Sed & illa libro primo scripsit: Nec verò
» solum curæ habendum arbitror liberalem
» ac simplicem in orationibus quoque ornatū,
» sed & conuenientem actionem, tum in vocis
» congruentibus modis, tum in oris manuum-
» que decentibus motibus ac figuris. Hoc loco
cū sit tam ambitiosè accuratus atque ex-
actus, contrā in eodem libro, cū de voca-
lium collisione quædam præmisset, non so-
lū ait, hæc esse negligenda sequentibus
præstantiora, sed & aliquas obscuritates,
& ellipses, & verò solæcismos, quorum non
paucos puderet. Quod itaque nunc vsque ad
manuum, ac oris decentiam concedit orato-
ribus, suam vt exornent orationem, rursus
verò permittit, vt defectuū, obscuritatūque
sint securi: sed & solæcismos citra ruborem
dicant, inconstantia est eius hominis, qui,
quicquid in buccam venerit, dicat.

In Naturalibus positionibus, cū dili-
genter monuisset, vt ne rebus experientiam
& historiam, hoc est, inspectionē requiren-

tibus assentiamur, ait: Neque cum Platone
sentiamus, liquidum alimentū in pulmonem,
siccum in ventriculum deferri, nec aliis hu-
ius generis erratis implicemur. Equidem
existimo, omnium & repugnantiam maxi-
mam & erratum turpissimū esse, si quis in eo
reprehendat alios, in quod deinde ipse sine
cautione vlla incurrat. Verū enim uerò
ipse ait, axiomaticum complexiones denario
numero confectas multitudine excedere
centum myriadas, cū hoc nec per se diligen-
ter quæsierit, nec hominum experientium
opera ad veritatē indagandam sit usus. At-
qui Plato sententiæ suæ testes habet Medico-
rum celeberrimos Hippocratem, Philistio-
nē, Dioxippum Hippocrateū, ac ex Poëtis
Euripidem, Alcæū, Eupolim, Eratoſthenē,
quippe qui omnes dicant, potum pulmones
transire: Chrysippum verò cuncti arguunt
Arithmetici, in quibus est Hipparcus. Oste-
dit enim Chrysippū in maximo calculi erro-
re versatū, siquidem Aientiū genus conficit

axioma

axiomatum complexorum X myriadas &
amplius ter mille quadraginta nouem: Ne-
gantium verò nongenta quinquaginta duo
supra triginta vnā myriadas.

VE TER VM nonnulli dicebant, idē
Zenoni vsu venire, quod illi acidum vinum
habenti, qui id nec pro vino, nec pro aceto
distrabere posset. Nam productum Zenoni
nec boni, nec indifferentis rationem habet.
Verū Chrysippus longē etiam difficiliore
eius rei dispositionem reddidit. Nunc enim
dicit illos insanire, qui diuitias, sanitatem,
quietem, corporis integritatē nibili faciunt,
nec consecretur: adductisq; illis Hesiodiis,

Perse operare, Deū genus.

subiungit insaniā esse contrariū suadere sic,

Ne tu Perse operere, Deū genus.

Item in cōmentariis de vitis ait, Sapientem
& cum regibus congressurū quæstus cau-
sa, & pecunia sapientiā venditaturū, ita vt
discipulorū ab aliis mercedē præcipiat, cum
aliis

aliis de ea paciscatur. Itē in septimo de offi-
ciis ait, sapientē in caput etiā saltaturū talē
ti mercede. Sed et in primo de bonis cōcedit
propemodū, & dat, vt quilibet pro arbitrio
suo producta appellet bona eisque cōtraria
mala. Ita enim scribit: Si quis vult iuxta cō- cc
mutationes hasce aliunde eorum appellare bo cc
num, aliud malū, sic sanē appellet, dummodo cc
in has res iudicio deferatur, nō fortē aber- cc
ret, vt earū quidem significata sine errore cc
teneat, cæteroqui verò in eis appellandi cō- cc
suetudinē consēctetur. Rursus verò qui di- cc
ctis locis productū bonis aggregarat, com-
miscueratq; in aliis contrariū dicit, in totum
nihil horum ad nos pertinere: imò rationem
nos ab omnibus huiusmodi auertere atque
auellere. Atq; hæc quidē in primo de exhor-
tādo scripsit. In tertio verò de Natura dicit
quòd à nōnullis regnātes, & copiis abundan-
tes beati prædicētur, perinde esse, ac si au-
reis matulis & fimbris vtentes beati præ-
dicarētur. Bono certē viro facultatū iactu-

ram nō grauiorē accidere, quā drachmæ
amissionem, pariāque esse naufragium, &
pedis offensionem. Huiusmodi rebus effectū
est, vt Chrysippus nō virtutem modò, scd
etiam providentiam cōtrariis istis repleue-
rit. Nam virtus quidem prorsus sordida &
stulta videbitur, si in istius modi rebus nego-
tietur, occupeturue, si sapientem carū causa
in Bosphorū navigare, inque caput saltare
iubeat: Iupiter verò ridiculus, si gaudeat co-
gnominibus Ditātis, Frugiferi, Gratificato-
ris, quòd scilicet largiatur hominibus au-
reas matulas & fimbrias, bonis autem viris
reculas drachma æstimandas, quādo ipsius
providentia locupletātur. Apollo certè risu
etiā paulò dignior, quòd sedeat responsurus
de aureis fimbriis & matulis, de pedū offen-
sionibus euitandis. Verū Stoici longè ma-
nifestiorē repugnantia sua ipsi demonstra-
tione reddunt. Quo siquidem, aiunt, bene &
malè licet vti, hoc neq; bonū est, neque ma-
lū. Atqui diuitiis, sanitate, corporis viribus,
omnes

omnes stulti malè vtiuntur. Sequitur, nihil horum bonum esse. Si Deus itaq; non dat hominibus virtutē, sed honestum viribus nostris cōparatur, dat autem diuitias & sanitatem sine virtute: certè ea dat non benè vsuris, sed malè, hoc est, damnosè, turpiter, & perniciosè vsuris. Ac si quidem Dii, cū possunt donare virtutē, non donant, boni & cōmodi nō sunt. Quòd si nequeunt bonos efficere, certè nec iuuare possunt, cū hoc sit positū, nihil rerum reliquarum bonum esse, nihil vtile. Quod verò Dii iudicant pro virtute ac robore eos, qui aliter quàm ipsorum ope boni sunt effecti, nihil est. Nam & malos boni pro virtute ac robore iudicant, vt dicendum sit, nō magis à Diis homines, quàm ab hominibus Deos iuuari. Verū nec se bonum pronuntiat Chrysippus, nec suorum familiarium aut antecessorum quenquam. Quid itaque de aliis Stoici sentiunt? An non ea quæ dicunt? omnes insanire, dementes esse, impios, legum violatores, ad summū infelicitatis ac omnis infortunij gradū peruenisse, nihilominus ta-

men res nostrū tam misere vuentiū prouidentia Deorū gubernari. Si Diī itaque, mutata volūtate, nos vellent lēdere, afflictere, torquere, conterere, non possent tamen nos peius tractare quā quomodo nunc sumus affecti, vt pronuntiat Chrysippus, in vita nostra nullum nec ad malitiam, nec ad infelicitatem augendam locum esse relictum: ita vt si loqui posset, dictura sit cum Hercule,

In malorum plena nouis non est locus.

Quæ itaque magis sibi repugnātia pronuntiata quisquā repererit, quā sint illa duo, quorū alterum de Diis, alterū de hominibus Chrysippus protulit: Deos quā fieri potest optimē providere hominibus, homines, quā fieri potest, miserrimē etatē degere?

Pythagoræorum nonnulli Chrysippum reprehendunt, quod in libris de iustitia scribat, gallinaceos vtiliter à natura proditos esse: nos siquidem expergefaciunt, scorpiones tollunt, pugnis suis nos excitant, amore studioque quodam fortitudinis iniecto. Eos nihilò minus comedendos, ne utilitatem

litatem vincat pullorū multitudo. Verūm Chrysippus vsqueadeò reprehensores istos contemnit, vt in tertio de Diis hoc scribat de Ioue Seruatore, patre iustitiæ, bonæ legislationis, pacis. Quēadmodum ciuitates hominum multitudine abundantes deducunt colonias, bella mouent, ita Deus pestis principia solet dare. Euripidem quoque, & alios testes laudat. Dicunt enim, Deos bellum Troianum exhauriendæ multitudinis hominum causa concitauisse. Harum sententiarum reliquas absurditates ac vitia omitte. Nec enim nobis propositū est, excutere quid parū rectè, sed quid repugnanter dicant. Illud modò consydera, quòd cognomenta honesta & humana, facta verò fœda Barbara & Gallicana Diis attribuit. Neque enim coloniarum deductionibus similes sunt pestes & exitia hominū, qualia bellum Troianum effecit, & deinde Medicum, ac Peloponnesiacum, nisi fortè sciant isti, apud Plutonem, & sub terra vrbes aliquas conditas

ditas esse. Verum Chrysippus assimilat Deum Dciotaro Gallo, qui cum vellet vni ex pluribus liberis regnum ac domũ legare, reliquos omnes iugulauit, quasi vitis palmites refecaret atque coërceret, vt vnus ille relictus, magnus atque robustus euaderet. Sanè quidem vinitor, dum palmites parui adhuc & debiles sunt, isthuc solet facere, nòsque dum catelli recentes adhuc & teneri sunt, eorum multitudinẽ, quò cani parcamus, itidẽ subducimus. Sed Iupiter, qui postquam non solũ negligenter passus est adulescere, sed ipsemet etiã produxit, & auxit, tunc demũ supplicio afficit, causas pestis atque exitij machinans. Atqui causas & principia nascendi nec præbita oportebat. Sed hoc crimen obiectũ Ioui minus est: illud maius, quòd cùm nullũ bellum sine vitio nascatur, sed omne vel voluptatis, vel pecuniæ, vel gloriæ, vel regni libido cõmittat, Deus generet: sequetur Deũ exasperando deprauandóq; hominũ mētes, etiam vitia suscita-

re. Quanquam ait ipse in libro, de indicādo, & iterum in secundo de Deis, quod parum sit rationi consentaneum, numen turpiū esse causam. Quemadmodū enim neque lex violandae legis causa fuerit. neque Dī impietatis exercendae, sic rationi consentaneū, eosdem nullius rei turpis autores existere.

Quamuis itaq; nihil turpius sit hominibus peste à se ipsis nata, Chrysippus tamen ait, Deum eius principia commouere. Atqui, dixerit quispiā, laudat certē Euripidem, quod dicat,

Si dī quid gerūt turpe, nō sunt Dī. Et illud, Dixerat facillimum criminari Deos.

Quasi verò nos aliud quicquā nunc agamus, quā ut istius dicta & sensa cōtraria proponamus. Vel hoc ipsum, quod nunc laudatur, non semel modò, bis, térue sed sexcenties contra Chrysippum vsurpare licebit,

Dixerat facillimum esse crimen Deūm.

Primum enim cū cyceoni illi multiplici potioni alias nutriendi, alias turbanti partes,

tes, comparasset varietatem motus rerū naturalium, hæc dixit: Quum vniuersi ordo sic procedat, necesse est iuxta eum, quomodo cunq; afficiamur, sic certè affici, siue contra naturam nostram ægrotemus, siue multati, siue Grammatici, Music'ue simus. Et paulò post: hac ratione similia dicemus etiã de virtute nostra & vitio, omninoque de artibus, & inertis, vt dicebam. Et paululū infrà tam apertè loquitur, vt omnem tollat ambiguitatem. Nihil enim rerum singularium, ne minimum quidem, aliter fieri potest, quàm iuxta cōmunem naturam, eiúsque rationem. Quod verò communis natura, & cōmunis naturæ ratio sit fatum, & providentia, & Iupiter, ne Antipodas quidem latet. A Stoicis enim vbique iactantur ista, Homerúsque rectè dixisse iudicatur,

--Iouis est perfecta voluntas.

quippe refert omnia ad fatum, & vniuersi naturam, à qua cuncta gubernantur. Quê ergo ista consistere possunt? nullius rei

turpis Deum autorem esse, & ne minimum
 quidem aliter fieri posse, quàm ex communi
 natura, eiusque præscripto. Nam in omni-
 bus, quæ fiunt, turpia sunt. Diis ergo sunt
 adscribenda. Atque Epicurus quidẽ in om-
 nem se versat partem, omnẽque mouet ar-
 tem; dum machinatur liberũ arbitriũ exol-
 uere sempiterno motu, ne vitium extra re-
 prehensionem ponatur. Iste verò laxissi-
 mam licentiam vitio concedit, quasi sit id fa-
 ctum, non solũ ex necessitate, aut fato, sed
 etiã Dei ratione, atq; optima natura intro-
 ductum. Quid quod hæc eisdẽ verbis scrip-
 ta reliquit? Cũ enim communis natura in
 omnia se porrigat, oportebit omne, quomo-
 docũque in vniuerso, & qualibet eius parte
 factum, iuxta illam, illiusque præscriptum
 fieri, consequẽtia minimẽ impedita, eò quòd
 neque extrinsecus quicquam sit æconomiae
 restitutum, neque partium vlla possit aliter
 moueri, aut se habere, quàm iuxta commu-
 nem naturam. Qui sunt igitur partium ha-
 bitus,

bitus, qui motus? Palam est habitus esse vitia, morbos, cupiditatem pecuniæ, voluptatis, gloriæ, timiditatem, iniustitiam. Motus verò stupra, furta, proditiones, homicidia, parricidia. Horum nihil neque tam paruum, neque tam magnum esse putat Chrysippus, quod contra Iouis præscriptum, legem, iustitiam, providentiam existat, ut iam neque contra legem fiat legis violatio, neque contra iustitiæ iniuria, neq; præter providentiam maleficium. Veruntamen dicit Deum punire vitiū, multaq; facere in pœnam malorum, ut in secundo de Diis, nonnunquam difficilia bonis ait obici, non quomodo malis, puniendi causa, sed alia ratione, ut in civitatibus evenire solet. Idem his verbis
” dicit: Primum mala sic sunt accipiēda, quo-
” modo in superioribus diximus. Deinde
” sciendum, ea distribui secundum Iouis ra-
” tionem, vel in pœnam, vel in aliquam aliam
” vniuersi dispensationem. Est hoc sanè graue
” & indignū, quòd ex Iouis ratione & nasci-

tur, & puniatur vitium. Sed & auget repugnantiam his verbis, quæ libro secundo de natura scripsit. Vitium propriam quandam rationem ad casus graues habet. Nam fit quodammodo iuxta naturæ rationem, ac, vt ita dicam, non inutiliter ad vniuersa. Neque enim bona essent alioqui. Itane verò audet iste eos reprehendere, qui ex æquo in vtranque partem differunt, cum ipse tam insano studio de rebus omnibus nouum aliquid, & peculiare, & eximium dicendi teneatur, vt dicat, non inutiliter fieri loculorum sectiones, sycophantias, stultitias, non inutiliter homines damnosos, infelices existere? Qualis quæso Iupiter est dicendus (Chrysippeum dico) si rem neque ex sese natam neque inutiliter factam punit? Nam Chrysippi ratio efficit vitium rem reprehensione prorsus indignam: Iouem verò accusatione dignum, siue quòd vitium rem inutile fecit, siue quòd id cum non inutiliter fecerit, nihilò minus punit. Rursus libro primo

primo de iustitia disputās de Diis, quasi pec-
catis aliquibus resistent, Vitium, inquit, pror-
sus tolli non potest, nec cōuenit sublatas esse
legum violationē, iniustitiā, nequitiam. Hic
quid verū sit, quærere nō est nostri instituti:
Illud tātūm notādū est, Chrysippū dū, quod in
se est, philosophādo tollit vitium, quod tolli nō
cōuenit, rem facere & disputationi suæ, &
Deo repugnantē. Adhæc q̄ dicit, Deū non-
nulla peccata impedire, rursus significatio-
nē dat, peccata esse à Dei sanctitate aliena.

Item cū sæpè scripserit, nihil esse in
mundo reprehensione aut querela dignum,
quippe cū omnia natura peragantur optima,
alibi contrā relinquit criminādas aliquas in-
curias & negligentias in rebus nec paruis,
nec contēnendis. In tertio nāq; de substātia
cū mentionē fecisset casuū, qui tali incuria
viris optimis accidat, utrū, inquit, huiusmodi
eueniunt, quòd aliqua negligentur, vt in
maioribus domibus obiter cadunt fursura
quædā, aliquótq; grana frumētī, cū tamen

vniversitas rectè gubernetur? An quòd talibus rebus præposita sint mala quædam dæmonia, in quibus iustissimè incuriæ sunt etiam reprehendendæ? Sed & necessitatis multum rebus admixtum esse dicit. Equidem nunc non dicam, quantæ sit leuitatis ac temeritatis, frumenti granis ac fursuribus obiter decidentibus assimulare optimorū virorum casus, vt Socratis condemnationē, Pythagoræ viui concremationem à Cylonæis factam, interitus Zenonis & Typhonis, alterius à Demylo, alterius à Dionysio excruciat, hoc, inquam, prætermitto: illud modò quaero, quomodo mala dæmonia talibus negotiis ex prouidentia præposita crimini nõ erunt Deo, vt Regi, qui malis & stolidis satrapis, ac ducibus administrationes committat, ad corūmq; negligentias & in bonos iniurias conuiuat? Quòd si necessitatis multum rebus est admixtum, sequitur Deū neque omnium compotē esse, neque omnia pro ratione arbitriòque suo administrare.

Pugnat

Pugnat cum Epicuro maximè & cum
 tollentibus diuinam providentiam: pugnat,
 inquam, atque inuadit eos ex notitiis, quas
 de Diis vt beneficis & humanis habemus.
 Quæ cum passim à Stoicis dicantur, nihil
 opus est eorum verba ascribere. Atqui be-
 neficos esse Deos non omnes mentibus an-
 ticipant. Qualia, quæso, Iudæi & Syri de
 Diis sentiunt? Quantæ quâque meticulo-
 sæ superstitionis plena sunt poëtarum car-
 mina?

Deum verò corruptibilem & genitum
 nemo (vt ita dicam) esse cogitat. Ac vt re-
 liquos omnes omittā, Antipater Tarsensis
 „ in opere de Diis hæc ad verbū scripsit: Ad
 „ efficaciam totius disputationis paucis tan-
 „ dem colligemus, quam de Deo notitiam ha-
 „ bemus. Deum itaque intelligimus esse ani-
 „ mal beatum, & corruptionis expertes, & be-
 „ neficum in homines. Deinde horum singula
 „ exponens sic ait: Atqui omnes arbitrantur
 „ cos interitus expertes esse. Nullus itaque

est Chrysippus, omniū numero excipiendus,
si Antipatro credimus. Nullum siquidem
Deorum putat immortalem Chrysippus
præter ignem, sed omnes ex æquo & geni-
tos, & interituros. Hæc ubiq; ferè ab eo di-
cuntur. Vnum autē locum adducā ex tertio
de Diis alterius ac diuersæ naturæ. Deorū
enim alij geniti sunt & mortales, alij sunt
ingeniti, quorū demonstrationē à capite ar-
cessere munus est sciētiæ naturalis peculia-
rius. Sol enim, & Luna, reliquique Dij na-
turam eandem habentes sunt orti: Iupiter
autem æternus est. Et infrà: Similia dicen-
tur de intellectu, & ortu, deque aliis Diis
& ipso Ioue. Nam cū reliqui sint morta-
les, huius partes corruptionis sunt exper-
tes. Cum his adhuc Antipatri pauca con-
ferre atque coniungere volo. Quicunque è
natura Deorum tollunt beneficentiam, a'i-
quatenus ad horum prænotationem accedunt,
similiter illi quoque, qui putant Deos ortus
& interitus esse participes. Ergo si æque
sunt

sunt absurdi, & is qui immortalitate, & is
qui procuratione atque humanitate deos
sententia sua spoliat, æquè lapsi sunt Chry-
sippus & Epicurus, hic beneficentiam Dii,
ille immortalitatem detrahens.

Sed & in tertio de Diis Chrysippus his
» verbis dicit, Deos reliquos nutriri. Alimen-
» tóque reliqui quidem Dii vtuntur similiter
» eius vi atq; ope contenti ac cohærentes. Ve-
» rum Iupiter & Múndus alio modo, quàm qui
» consumuntur, & ex igne reparantur. Hic
promittit reliquos omnes Deos nutriri, ex-
cepto Ioue, & Mundo. Contrà in primo de
providentia dicit, Iouẽ augeri, donec in ipsum
omnia absumantur. Nam cùm mors sit ani-
mi à corpore separatio, animus autẽ Mun-
di non separetur, sed vsque crescat, donec
in se materiã absumpserit, nõ est dicendũ mo-
ri Mundum. Quis itaq; cõtraria magis ipse
sibi reperietur dicere, quàm is, qui eundem
Deũ? Verũ quid collectione mea opus est?
» Nã ipsemet apertè scripsit in eodẽ loco: Sibi
solus

solus Mundus sufficere dicitur, quòd omnia
 in se complectatur, quibus opus habet, ex
 seque nutriatur & augeatur, cum reliquæ
 particulae in sese inuicem digerantur. Non
 solum itaque sibi repugnat in illis locis, re-
 liquos Deos, exceptis Mundo & Ioue, ali
 pronuntians, in hoc etiam Mundum ali di-
 cens: sed adhuc magis asserens, Mundum
 augeri ex seipso altum: cum contrà sit ve-
 risimile, hunc solum non augeri, qui ex sui
 diminutione alimentum habeat, reliquos ve-
 rò Deos extrinsecus præbito alimento au-
 geri, magisque Mundum in hos absumi, si
 Mundo ex se, his à Mundo datū est aliquid
 semper sumere, indeque nutriri.

ALTERVM, quod Deorum notio
 mentibus nostris informata continet, est illa
 felicitas eorum, & beatitudo, omni detra-
 cta indigentia. Vnde etiam Euripidem lau-
 dant, quòd illa dixit,

*Eget nanque nulla earum rerum Deus,
 Deus si verè est.--*

Verum misera hæc verba sunt.

Ac

At Chrysippus in eis, quæ descripsi, solum Mundum ait abundè omnia sibi suppeditare, quòd omnia, quibus indiget, in se solus habeat. Quid itaque sequitur si posuerimus solum Mundum esse perfectum, sibi que sufficientem? An non illud, neque Solem, neque Lunam, neque Deorum reliquorum quenquam sibi sufficere? Quod si est, efficitur eos neque felices, neque beatos esse.

Putat factum in utero natura nutriri plantæ modo, cùm verò editur, tunc refrigeratum ab aëre ac temperamento firmatum, densatumque mutare spiritum, fierique animal. Vnde non sine ratione animum appellatum esse $\psi\chi\eta$ ob $\psi\chi\eta$, id est, refrigerationem. Rursus ipse secum pugnas arbitrat animum esse rariorem subtiliorémque naturæ spiritum. Quî enim per refrigerationem & densationem fieri potest aliquid tenuium partium & rarum, ex eo quod est crassarum partium? Quod verò maius est, quomodo refrigeratione aliquid animari
 pronan

pronuntians solem putat animantem esse,
cùm sit igneus, & natus ex euaporatione in
ignem mutata. Ita enim scribit in tertio de
natura: Ignis mutatio talis est. Per aërem in
aquam mutatur, ex hac aër, subsidente ter-
ra, exhalatur. Aëre rursus tenuato æther
in orbem circumfunditur. Astra verò cum
Sole è mari accenduntur. Sed quid per
Deos cōtrarium magis est accensione, quàm
refrigeratio? diffusioni, quàm densatio?
cùm altera ex igne & aëre faciant aquam
& terram, altera conuertant humidum
quod est, & terrenum in ignem atque aë-
rem. Veruntamen Chrysippus nunc ac-
censionem, nunc refrigerationem anima-
tionis principium constituit. Atqui cùm
Mundus totus ignescit, tunc viuere & vi-
uens animal existere dicit, rursus cùm ex-
tinguitur & crassescit, tunc animal in a-
quam, terram, & corporeū quiddam cōuer-
ti. In primo verò de prouidentia ait: Cùm
Mundus est omnibus sui partibus igneus,
statim

„ statim & animus sui est, & dux ratio. Cùm
 „ verò mutatus in humidum, & relictum in-
 „ tus animū, quodammodo in corpus, & ani-
 „ mum mutatur, vt ex his constet, tunc alio
 „ sese modo habet. Hic utique dicit apertè
 mundi partes inanimas ex cādescencia con-
 uerti in animantes, contrāque restinctū
 & animum remitti, & humescere ita, vt in
 corpus abeat. Absurdus itaque videtur
 Chrysippus, qui refrigeratione nunc ex
 non sentientibus faciat sentientia, nunc in
 carentia sensu & animo partem animi mun-
 dani maximam conuertit.

CAETERVM vt hæc omittantur,
 illa de animi generatione disputatio ipsius
 placito contrariam demonstrationem con-
 tinct. Dicit enim, vt in ferro acies tem-
 peratione firmatur, sic in partu nunc edito
 refrigeratione animum spiritu se mutante
 fieri. Iam verò ad probandū animum fuisse
 factū, postq; genitum esse, ista maximè de-
 monstratione utitur, quòd gnati & morum,

&

& ingenij similitudine parētes repræsentēt.
 Sed harū rerum pugna vel oculis cerni po-
 test. Neque enim fieri potest, vt animus, qui
 post partum generatur, moribus formetur
 ante partum: aut eueniet, priusquā factus
 fuerit animus, eū similem esse animo paren-
 tū, hoc est, & similitudine esse, & non esse,
 eò quòd nondum extitit. Si quis dixerit, eò
 quòd similitudo corporum constitutionibus
 ingeneretur, animos, cū generantur, mu-
 tari, is argumentum corrumpit, quo proba-
 tur, animum factum esse. Nanque hoc modo
 fieri potest, vt cū sit ingenuus, constitutio-
 ne similis corporis mutetur, postquā extrin-
 secus ingressus fuerit.

DICIT aliquando, aër ē leuitate natia
sursum ferri, aliquando eum neque grauem,
neque leuē esse. Itaque in secundo de motu
scribit, etiam ignem grauitatis expertem
sursum ferri, ac in hoc aër ē igni similem: vt
aqua terræ, aër igni magis attribuatur. In
naturalibus verò artibus in alterā inclinatur
opinio

opinione, vt putet aërem nec pondere ex se,
nec leuitate præditum esse.

ITE Maërem dicit natura sua tenebro-
sum esse, hoc argumento, quòd sit etiam pri-
mò frigidum. Nam eius tenebrositatem op-
poni ignis splendori, frigus calori. Hæc
cùm in libro primo naturalium quæstionum
agitetur, rursus in commentariis de habitibus
ait, habitus nihil aliud esse, quàm aëres. Ab
his enim continētur corpōra, quarēque vnū-
quodque eorum, quæ habitu continentur,
quale quiddam sit, autor est is, qui continet
aër, quem eundem duritiem in ferro, densi-
tatem in lapide, albedinē in argento vocant.
Sed hæc & valde sunt absurda & valde
secum pugnant. Si nanque talis manet aër,
qualis natura sua est, quomodo quod nigrum
est, fit albedo in eo quod non est album? quod
molle est, in non duro durities? quod rarum
est, in non denso densitas? Quod si dum
miscetur, in his mutatur, assimilaturque,
quomodo est habitus, aut vis, aut causa ho-

rum, à quibus vincitur? Nam huiusmodi mutatio, qua suas qualitates aliquid amittit, patientis est, non agentis: viribus deficientis, non continentis corporis. Quid quod ubique pronunciant, materiam ex se inertem atque immobilem subiici subſternique qualitatibus, quas ſpiritus & tonos aëroſos appellant? Hos igitur quibuſcunque materiæ partibus ingenti fuerint, eas informare atque figurare. Quæ Stoici non poſſunt dicere, ſi, qualem diximus, aëris naturam ponunt. Nam cùm ſit aëri habitus ac tonus, aſſimilabit ſingula corpora, vt iam omnia nigra & mollia ſint futura. Quòd ſi cōmiſtione cum corporibus temperatus contrarias ſuis & naturalibus recipit formas, materia quodammodo materiæ, non cauſa aut vis eius fuerit.

A' CHRYSIPPO ſæpe dicitur, illud extra mundum vacuum, infinitum eſſe: infinitum verò neque initium, neque medium, neque finem habere. Atque hac maxime
ratione

ratione illam atomi ab Epicuro dictam descensionem spontaneam Stoici tollunt, quòd nò sit in vacuo infinito differētia, per quam aliud suprà, aliud infrà intelligatur fieri. Atqui in quarto τοῦ δυνάτωρ cūm posuisset, medium quendam locum, mediámque regionem, ibi ait innixum sedere mundum.

- ” Verba Chrysippi sunt hæc: Quare dicendum est etiam de mundo, quòd is sit corruptibilis & interiturus, quamvis hæc res disputatione indigere putetur. Verū enim vero
- ” mihi hoc magis videtur. Propemodum tamē mundo ad nescio quam incorruptibilitatem multum confert etiam regionis occupatio, putà quòd in medio sit. Nam si alibi situs intelligeretur, omninò etiam corruptio ei coniungeretur. Et paululum infrà: Nam hoc penè modo substantia ab omni æternitate constitit, medio loco occupato, statim à principio talis existens, ut si quo alio prætereà modo, certè ob sortitionē talis loci corruptionē non admittat: ex quo sempiternum

esse dicendum sit. Hæc vnā manifestam
& conspiciendam repugnātiā continent,
scilicet infiniti medium aliquem locum, me-
diāque regiōē esse: alteram obscuriorem
illam quidem, sed absurdiorem. Arbitrans
enim mundum non posse interitus exper-
tem permanere, si alia vacui parte sederet,
plenum facit se timere, ne si partes substan-
tiæ ad medium non ferantur, dissolutio cor-
ruptioque mundi consequatur. Quæ ne-
quaquam timeret, nisi arbitraretur vndique
corpora ad medium natura sua ferri, ad me-
dium, inquam, non substantiæ, sed loci sub-
stantiam continētis, de quo etiam sæpe dixit,
quasi fieri non posset, aut contra naturam
fieret. Neque enim esse in vacuo differen-
tiam, cuius ratione corpora magis huc,
quàm illuc adducantur. Mundi verò con-
structionem causam esse motus ad centrum
& medium, vergentibus deferentibúsque eò
se vndique corporibus. Sufficit ad hoc pro-
bandum adferre locum ex secundo de motu.

Nam

Nam cum proposuisset, mundum esse corpus perfectum, partes non item, eò quòd sint affectæ quodammodo ad totum, nec per se sint: itémque cum disseruisset de motu mundi, quòd vitanda dissolutione fractionéque, ad coherentiam continentiamque sui per omnes partes natus sit moueri, hæc subiūxit:

„ Sic autẽ vniuerso tendente còdem ac moto,
„ partibus quoque pro corporis natura eandem
„ motionem habentibus, probabile est,
„ omnibus corporibus à natura inditum esse
„ motum hunc primum ad medium mundi locum,
„ cum, mundo quidem sic moto, vt ad se referatur,
„ partibus verò, tanquam partibus, seu
„ quatenus vt partes considerantur. Itane verò? dixerit aliquis. Equid tibi accidit, bone vir, quod horum verborum memoriam tibi excusserit? vt pronunties mundum dissolutioni corruptionique obnoxium fore, nisi mediam regionem fortè occupasset. Si nanque natura sua vergit ad idem medium, còdemque partes vndique contendunt, certè

quacūq; parte vacui ponatur, sic se continēs
ac constringens mundus, corruptionis atque
fracturæ expers permanebit. Nā quæ fran-
guntur dissipanturque, ea utiq; corrup-
puntur, cum singulæ partes discretæ ac
dissolutæ ex non naturali ad naturalem locū
defluunt. Tu verò, qui mūdo corruptionem
annecti putas, si alio quàm medio vacui loco
ponatur, ac proinde medium dicis esse in re
medium habere non nata (vacuo inquam)
tensiones quidem, continētias, nutūsque illos,
tanquam nihil certi firmique ad salutem ha-
bentes, omisisti, occupationi verò loci totam
causam adscripsisti. Quid quòd illa iam
dictis annectis, quasi ipse te refutare conten-
deres. Ais: Quo verò modo partes sin-
gulæ mouentur, ex eo quòd reliquo connatæ
coniunctæque sunt, eodem sanè modo con-
sentaneū est eas per se moueri, si disputatio-
nis gratia cogitatione finxerimus, posueri-
musque, eas esse in aliquo huiusce mūdi va-
cuo. Ut nanque vnaquæque pars vndique
coniun

» coniuncta atq; contenta moueretur ad me-
» dium, sic & si disputationis gratia fingamus
» circa ipsam repentè vacuum esse, eundem
» seruabit motum. Scilicet pars quaelibet
vndique vacuo circumdata non amittit incli-
nationem ducentē ad mediā mundi regionē:
ipse verò mūdus, nisi fortuitus casus ei para-
uerit medium locum, perdet tonum vīnque
continentē, aliæque aliò substantiæ ipsius
partes dilabentur. Atque hæc quidem,
quod ad naturalem scientiam attinet, ma-
gnas contradictiones habent. Illud verò
etiā disputationi de Diis ac providentia re-
pugnat, quòd cū minimas causas rerum
eis attribuat, quod præcipuum tamen &
maximum est, auferat. Quæ res enim maio-
ri potentia fit, quàm mundi perpetua per-
mansio? aut quàm substantiæ partibus se-
cum vnitæ continentia? Verū hæc, Chry-
sippi sententia, fortuitò contigit. Nam si
loci occupatio est immortalitatis causa, ea
verò fortè contigit, consequitur nimirum,

vniversi salutem non fati & providentiæ,
sed fortuiti casus opus esse.

DISPUTATIO verò πρὸς δυνά-
τωρ, hoc est, de eis, quæ fieri possunt, quin pu-
gnet cum illa de fato, quomodo Chrysippus
defendet? Nam si id, quod fieri potest, Dio-
dorus non rectè sic definiuit, quod aut est,
aut crit verum: sed ita definiendum est, o-
mne quod fieri potest: vt sit quod natura
sua admittit vt esse possit, quâvis nunquam
sit futurum: multa erunt, quæ fieri poterunt,
quæ tamen ex fato inuictò, inexpugnabili,
omnibûsque superiore non fierent. Aut igi-
tur fatum vim suam amittit, aut si fato, vt
censet Chrysippus, ea constat, illud quod
natura sua recipit vt esse possit, sæpe in cau-
sam impossibilis incidet. Ac omne quidem
verum erit necessarium, potentissima ne-
cessitate occupatum: rursus omne falsum
impossibile, quippe maximam habens cau-
sam repugnantem, quò minus verum fiat.
Nam cui fatatum est in mari mori, quæ po-
test

testis obnoxius esse morti in terra contingenti? An is, qui fati necessitate Megaris tenetur, poterit Athenas proficisci?

SED ET EA, quæ de visis dicuntur, validè fato aduersantur. Nam volens ostendere, visum non esse perfectam causam assensionis, dixit, sapientes læsuros esse, cum falsa visa ingerunt, si visa planè ac perfectè assensiones efficiant. Sæpe enim sapientes falso apud malos vtuntur, visumque probabile obuciunt, non etiam assensionis causam, quandoquidem visum tale fuerit etiam causa falsæ opinionis & deceptionis. Hæc itaque si quis à sapiente ad fatum transferens dicat, non ob fatum fieri assensus, quippe fato peruenient etiam falsi assensus, opinionones, deceptiones, sicque fato lædentur homines, certè conclusio, quæ sapientem omnis iniuriæ importatione eximit, simul etiam ostendit, fatum non esse causam omnium. Nam si fato neque opinantur, neque læduntur homines, planum est, quòd neque rectè

faciunt, neque sapiunt, neque sentiunt constanter, neque iuuantur fato, vt iam perierit illud decretum Chrysippi, fatum omnium esse causam. Si quis dicat, Chrysippum non fecisse fatum absolutam horum causam, sed prægressum modò principium, illic rursus ostendet cum sibi repugnare, vbi Homerum summopere laudat de Ioue dicentem,

*Ferte ergo, singulis vestrū quod miserit omne,
Siue bonum sit, siue malum.--*

Item Euripidem, --O Iuppiter

Quid miseros mortales putare dixerim?

Te quidē aptamur, facimúsque, quæ cogitas.

Sed & ipse multa his consentientia scribit. Ad extremum ait, nihil sisti, nihil moueri, ne minimum quidem aliter, quàm pro Iouis ratione, quæ eadem est cum fato. Prætereà causa prægressa modò, ac initium pellēs, infirmior est, quàm absoluta, nec effectū peragit, quippe ab aliis resistentibus victa.

Fatū

Fatū verò Chrysippus, vt causam inuictā,
omni impedimēto maiorem, immutabilēmq;
esse pronuntiat, sic etiam id atropum, quasi
dicas immutabile, Adraſtea neceſſitatem,
πεπωμένην, id est, omnibus finē imponens,
appellat. Vtrū igitur negamus in potesta-
te nostra esse virtutes, vitia, rectas, contra-
riāsq; actiones? an verò dicimus fatum de-
ficere, & πεπωμένην esse ἀπερωτάτου: hoc
est, finitricē causam finiendi perficiendiq;
vim non habere, Iouisque motus & habitus
consummare nō posse? Nam illa sequuntur,
si fatum est absoluta causa: hæc, si initium
tantū pellit, hoc est, si est absoluta & per-
fecta per se causa, voluntatem & liberum
arbitrium tollit: sin initians tantū, vim
ad finem sine impedimento perducendi atq;
absoluēdi amittit. Neq; enim semel, aut bis,
sed passim, imò in omnibus rerum naturalium
commentariis scripsit, singularibus naturis
ac motibus multa opponi impedimenta, cæ-
terū naturæ vniuersi nihil resistere. Sed
quomodo,


quomodo, quaeso, vniuersi motus in singularem rerum motus sese extendens ac exerens, illis impeditis atque prohibitis, ipse sine impedimento & prohibitione pergit? Neque enim hominis natura est sine impedimento, si pedis aut manus natura sit impedita. Neque naus motus impedimento caret, si quae circa malum aut remigium peraguntur operationes, aliqua patiantur impedimenta. Ac ut haec omitram, quaero, si quidem visa non fiunt ex fato, quomodo fatum erit assensionum causa? Quod si eò, quod visa praecurrentia atque ad assensionem ducentia fatum excitat, assensiones dicuntur fato fieri, quomodo non pugnat ipsum secum fatum? quippe quod in maximis rebus contraria visa multoties obuiat, mentemque in contrarias partes distrahat. quibus casibus Stoici dicunt eos, qui assensionem minimè sustinentes alteri visorum accedunt, peccare, ac impingere quidem, si obscuris incertisque cesserint: si falsis, falli ac decipi: si communiter

non comprehensis, tunc eos opinari modò ac putare. Quum quidem certè tria, nec plura reperiri possint, vt aut nò omne visum sit fati opus, aut omnis visi susceptio, ac assensus sine vitio fiat, aut nec ipsum fatũ reprehensione carcat. Nescio nanque quĩ crimine fatum carere possit, si talia visa cõmouet, quibus sine repugnatione cessise culpa sit.

QVINETIAM in illis aduersus Academicos concertationibus maxima ipsi Chrysippo & Antipatro in eo asserendo suscepta est contentio, Nullum nostrũ aut agere quicquam, aut se cire sine assensu: eos verò figmenta atque inauditas res narrare, qui censent quenquam ex commodo viso statim citra cessionem, citràque assensionem impetum capere. Rursus ait Chrysippus, & Deum, & sapientem visa immittere, minimè id quidem petentes, vt iis assentiamur, aut cedamus, sed vt agamus modò, & impetum capiamus ad id. quod videtur: verũ nos vitiosos præ imbecillitate talibus visis assentiri.

assentiri. Harum sententiarum inter se
 pugna facile potest perspicui. Nam qui non
 postulat, ut visis, quæ ingerit, assentiamur,
 sed tantum, ut agamus, siue Deus is est, siue
 sapiens, nouit, quod ad agendum visa suffi-
 ciunt, & ascensus superfluum, sicut si, cum
 scit visum non excitare nos ad agendum
 citra assensum, falsa & probabilia visa con-
 citat, voluntarius ac libens autor cau-
 sâque existit, quare nos ac-
 cedentes non perce-
 ptis visis pec-
 cemus.

F I N I S.









Q V A E A L I T E R

in Græco exemplari legenda
putauit interpres.

*Numeri indicant interualla quin-
decim linearum in exem-
plari Basiliensi.*

5 ἐθδ.] ἐκεῖ.

7 ἀπ' ἐκείνων οὐ χωρὶς ὁδεμίας ἀρχὴν ἀπ' ἐ-
κείνου.] ἀπ' ἐκείνου & πρὸς ἐκείνου fortas-
sis legendum.

7 φησι τὸ πρὸς τὰ ἐναντία διαλέγεσθαι.]
φησι. Deinde initium nouæ annota-
tionis, τὸ πρὸς τὰ ἐναντία διαλ.

7 τὰ ἐναντία σοιχεῖσθαι &c.] vt potui me
hinc expediui.

7 ἐν λόγοις.] ἐν ὀλίγοις.

8 ὅτε ψευδῆς ἐσι.] ψευδῆ.

9 οἷς τε ἀνεῦρες.] videtur οἷς ὅ, τι ὕσερον
ἀνεῦρες, aut simile quippiam.

10 ὡς ὅτι κατ' ἀληπῶν ἐσι.] ὡς εἰ τε κατ' ἀ-
ληπῶν ἐσι.

12 τῶν φύλων ὁδενός.] ὁδέν.

12 αὐτὰ γὰρ τὰ λυμάτα.] puto λυμάτα.

13 αὐτῇ.] αὐτῆς.

13 ὡδὴ] ὁ δέ.

15 πᾶν ἀγαθὸν ἔτε.] εἴτε πᾶν ἀγαθὸν ἔτε.

17 ἀπολειπομένης.] ἀπολείπομένης.

17 ὅν δὲ τοῖς πρὶ πλατῶνα.] πρὸς πλατῶνα.

17 πάλιν τῷ μὴ.] τὸς.

21 ἥν ἀφρονα μάλλον, ἢ βιῶν.] ἢ μὴ βιῶν.

21 πρὸς τοῖς μήτε.] παρ' αὐτοῖς.

21 λυσιτελέσετον ἡγάτη.] deest ἔν, aut si-
mile quiddam.

ὅ γὰρ

21 ὃ γὰρ προσέειπεν.] ὃ γὰρ πρὸς τὸ.

22 ἀπερσία τῷ ἀδιαφόρως ἐπίσταδι τῷ ἀγα-
θῷ.] ἀπερσία τῷ τῷ ἀδιαφόρως ἀφίσταδι
τῷ ἀγαθῷ.

24 ἢ λεύκωμ.] est λάκωμ γνὶς ἔρῃ πρὸς τῷ κοι-
νῷ γνῖνοιωμ.

27 τινὰς ἀνανδεδόκσι.] ἀναδενδόκσι.

27 πρὸς ἀκοήν καὶ τέρεψιν] ὅψιν.

28 γνῶταῦθα δὲ ἀπόλογον τῷ κατὰ λογικῶν.]
ἀπόλογον. deinde nouæ annotationis
initium, τῷ κατὰ λογ.

28 ἐπίκλησιν.] ἐπὶ κλίσιν.

28 ὡς βιαζομένης τῷ γνῶταίω.] ἀνακτῶ.

29 φαῖεν εἶναι καλὴν δὲ ἐδεμίαν αὐτῷ λα-
βεῖν.] φαῖεν εἶναι καλὴν. δέοι δὲ μίαν αὐτῷ
λαβεῖν.

29 τῷ διαφορῶν λήψιν.] ἀδιαφόρ.

32 ὃ καὶ.] ἀλλὰ καὶ.

32 ὅτι αὐτὸς εἶπεν.] ἐπὶ τῷ.

33 μήτε ὡς διαφόρου.] ἀδιάφορου.

34 τοῖς ὑπὸ ᾧ.] τῷ.

34 λακὰ τὰς τοιαύτας] ἡ.

34 ἔφ' τὴν ὑσίαν] τὸ.

34 καὶ τὸ νοῆσαι.] νοῆσαι.

35 προσκομμάτων] προσκομμάτων.

38 εἰ θεοὶ ἐκ δρωσιν ἀγρόν.] φαῦλον, γὰρ ἔφ'
ὡς δεινὸν τὸ νέον ποιημάτων ἀκρίβειαν.

38 τὸ ἀδούριον ἐκ λινέσεως] τὸ ἀλλοῖον.

39 ἀναπεπταμένην] ὅ δ' ἀναπεπταμένην.

40 καὶ οὕτως.] ὅτι.

41 ἐνίωρ ἀδικήμασι] γένεσι.

41 τὸ ἡεῖν.] deest aliquid, puta τὸ ἀληθές.

41 ὅτι πρὶ τῷ] ἔτι.

42 διοικεῖν] πρὸς τὸ ἐπίκρουσιν] πρὸς τὸ ἐπί-
κρουσιν, nouum initium.

λόγος

42 λόγος πρὸς ἐνέργειαν] ἐννοιαὶ videtur
decisse.

44 ὁ δὲ νὸς αὐτῶν οἶδε δόξουσι λόγοι] κλη-
μῆς γὰρ ἔπειτ' ἐμπῶ σρωμάτῳ, εὐριπίδης
πρὸς τῶν θυσιῶν. δῆτ' γὰρ ὁ θεὸς εἶπερ ἐς
ὀρθῶς θεός. αἰσιδῶν οἶδε δόξουσι λόγοι.

45 ὁ αὐτὸς ποριέχεται] ποριεῖται αὐτ ποριχύνεται.

46 τῇ ἀρὰσὶ τοῦ ὁμοίουτος] fortassis τοῦ σώματος.

48 ὥς ἐ μάλα.] μέλαρ.

48 καὶ ὁὖτο μάλισα.] πύντω.

48 αὐτῶ συνάπτοι.] συνάπτοιτο.

49 πλὴν αἰτίαρ χώρας] πλὴν ὅσϊαμ.

50 τῇ τῇ ἀπείρῳ.] fortassis φημι τῷ ἀ-
πείρῳ.

51 ἡνομένῃ.] ἡνωμένη.

53 εἰ μὴ πρὸς τὸ ἰσίου.] superfluit negatio.

54 ἀνευ ᾧ τῶτων] Ex hoc loco, ut potius

mus, nosmet expediuimus. Reliqua
sunt aut facilis emendationis, aut deplo-
rata deprauationis, nisi succurrat, qui
potest, eis & cæteris Plutarchico-
rum operum mendis alter pe-
nè parens meus Henry-
cus Scrymgerius
nostras.

ss
9

FINIS.









